

四庫全書

子部

欽定四庫全書

神農本草經疏卷五

明 繆希雍 撰

玉石部下品

總九十三種今疏其要者二十三種

伏龍肝

石灰

百草霜附

砒霜

鐳墨

硃砂

鉛丹

鉛

粉錫

東壁土

赤銅屑

銅青

井底泥

代赭

戎鹽

地漿

自然銅

梁上塵

礞石

麥飯石

花乳石

蓬砂

鉛霜

古文錢

伏龍肝味辛微溫主婦人崩中吐血止欬逆止血消癰

腫毒氣

此竈中對釜月下黄土以年久如赤色石中黃者佳研細水飛用

疏○伏龍肝得火土之氣而成本經味辛氣微溫無

毒甄權言鹹其質本土味應有甘以竈有神故古方多以之治顛狂寐魘及卒中邪惡等證本經主婦人崩中吐血止欬逆止血者蓋以失血過多中氣必損甘能補中微溫能調和血脈故主之也消癰腫毒氣者辛散鹹軟之功也日華子主催生下胞及小兒夜啼者取其土中有神而性本沖和復能鎮重下墜也

主治參互

千金方卒中惡氣伏龍肝末一雞子大水服取吐

救急方產後血氣攻心痛惡露不下竈中心土研末
酒服二錢瀉出惡物立效 傷寒類要妊娠熱病伏
龍肝末雞子許大水調服之仍以水和塗臍上方寸
乾則再上 外臺秘要一切癰腫伏龍肝以蒜和作
泥貼之乾再易或雞子黃和亦可

簡誤

陰虛吐血者不宜用以其中有火氣故也癰腫毒盛
難消者不得獨用

石灰味辛溫主疽瘍疥瘙熱氣惡瘡癩疾死肌墮眉殺
痔蟲去黑子息肉療髓骨疽

疏○石灰燒青石而成故其味辛氣溫本經不言其
毒觀所主皆不入湯其為毒可知矣火氣未散性能
灼物故主去黑子息肉及墮眉也其主疽瘍疥瘙熱
氣惡瘡癩疾死肌髓骨疽者皆風熱毒氣浸淫於骨
肉皮膚之間辛溫能散風熱毒氣且能蝕去惡肉而
生新肌故為諸瘡腫毒要藥也辛而燥故又能殺痔

蟲古方多用合百草團末治金瘡殊勝者以其性能
堅物使不腐壞且血見石灰則止而百草又能活血
涼血故也

古墓中石灰名地龍骨火毒已出燥烈大減故主頑
瘡癩瘡膿水淋漓及斂諸瘡口尤效

船油灰名水龍骨得油性之潤復得水氣之陰故
主金瘡跌撲傷損破皮出血及諸瘡癩血風腫瘡也

主治參互

入三仙膏點一切癰疽腫毒輕者可消重者勢亦減
普濟方疣痣瘤贅石灰一兩用桑灰淋汁熬成膏
刺破點之 又方去癰疽瘀肉石灰半斤麥稈灰半
斤淋汁煎成霜窰封每以針劃破塗之自腐落有毒
不入湯丸故無簡誤

百草霜乃煙氣結成其味辛氣溫無毒辛主散故能
消化積滯及下食也凡血見灰則止此藥性能止血
復能散瘀滯故主上下諸血及崩中帶下胎前產後

諸病

主治參互

筆峰雜興方胎動下血或胎已死百草霜二錢椶灰
一錢伏龍肝五錢為末每服二錢白湯入酒及童便
調下 杜壬方治橫生倒逆胎前產後虛損月候不
調崩中帶下百草霜白芷等分為末每服二錢童子
小便醋各少許調勻熱湯化服不過二服瘥

簡誤

雖能止血無益腸胃救標則可治本則非故不宜多服

砒霜味苦酸有毒主諸瘡風痰在胸膈可作吐藥不可久服能傷人飛鍊砒黃而成

畏菘豆冷水入藥醋煮殺毒用

疏○砒霜稟火之毒氣復兼煅煉本經雖云味苦酸而其氣則大熱性有大毒也酸苦涌泄故能吐諸瘡風痰在胸膈間大熱大毒之物故不可久服能傷人也更善落胎及枯痔殺蟲

簡誤

按砒黃既已有毒見火則毒愈甚而世人多用砒霜以治瘡不知內經云夏傷於暑秋必痲瘡法當清暑益氣健脾是為正治豈宜用此大熱大毒之藥如果元氣壯實有痰者服之必大吐雖暫獲安而所損真氣實多矣初燒霜時人在上風十餘丈外立下風所近草木皆死以之毒鼠鼠死猫犬食之亦死人服至一錢許則立斃若得酒及燒酒服則腸胃腐爛頃刻

殺人雖菘豆冷水亦難解矣其於鈎吻射罔之毒殆
又甚焉奈何今人用之治瘡是以必死之藥治必不
死之病豈不誤哉除枯痔殺蟲用於外傳之藥此外
慎毋服之切戒切戒

鎊墨主蠱毒中惡血暈吐血亦塗金瘡生肌止血

疏○鎊墨釜月中墨也本經無氣味然觀其所主大
約與伏龍肝相似而其用則少劣也凡血見灰見黑
則止蠱毒惡氣得辛溫則散故本經主蠱毒中惡吐

血血暈以酒或水細研溫服亦塗金瘡生肌止血也
慎勿入傅面瘡藥中其黑入肉如黥不能去也血暈
宜用米醋研服

硃砂作硃味鹹苦辛溫有毒不宜多服主積聚破結血爛

胎止痛下氣療欬嗽宿冷去惡肉生好肌柔金銀可為

錐藥形如牙硝光淨者良

凡用水飛去塵穢入
甕器中重湯煮乾

疏○硃砂乃鹵液所結秉陰毒之氣含陽毒之精其
味極鹹極苦極辛氣溫有毒甄權酸鹹有大毒能消

五金八石腐壞人腸胃生食之化人心為血其毒之
猛烈如此可畏矣其主積聚結血宿冷者以鹹能入
血軟堅辛能散結溫能除冷故也積聚散則痛自止
氣自下因寒以致頑痰壅結則欬嗽作故暫用以散
之柔金化石之性故能爛胎及去惡肉也金石見之
即化其能生好肌乎此前人之誤耳

主治參互

普濟方損目生瘡赤肉弩出不退杏仁百粒蒸熟去

皮尖研濾取淨汁入礪砂末一分水煮化日點一二
次自落 白飛霞方鼻中息肉礪砂點之即落此方
須入明礬牛黃鉛粉象牙末真珠末乃佳 集效方
面上疣目礪砂少許研砂鐵鏽麝香等分研搽三次
自落急以甘草汁浸洗

簡誤

按礪砂大熱有毒之物近出於唐世而方書不著古
人單服一味伏火作丸子亦有兼礪黃馬牙硝輩合

餌者不知方出何時殊非古法此物雖能攻積聚凝
結化有形癖塊然多食腐壞人腸胃觀其柔化金銀
銅錫及庖人煮硬肉入礪少許即爛可以類推矣惟
去惡肉及惡瘡息肉目翳弩肉是其所長亦須與真
牛黃龍腦鉛華象牙末等同用其內服諸方雖唐慎
微已收附本草末然服必害人命悉不敢載一名狄
鹽一名北庭砂一名氣砂一名透骨將軍中其毒者
生菜豆研汁一二升飲之畏漿水忌羊血

鉛丹味辛微寒主吐逆胃反驚癇癩疾除熱下氣止小便利除毒熱臍攣金瘡溢血鍊化還成九光久服通神

明

自炒成者佳市中多雜砂土礬紅不堪用

疏○鉛丹即熬鉛所作黃丹故其味辛氣微寒性應無毒鉛稟先天壬癸之氣得火成丹則又有靈通變化之神其體重而降胃反吐逆火氣上升也驚癇癩疾心氣虛怯也得潤下鎮重之性則火不上炎熱氣自下心腎得交而前證除矣稟天一所生之氣故能

除熱毒及金瘡溢血也止小便利者心與小腸為表裏心神寧斂則小便自有節也臍攣者即小兒臍風也風熱入肝則筋自攣急辛寒鎮重能散風熱金液之性能平肝木故主之也久服通神明者以其得先天之氣故能鎮心安神也今世又用以解散熱毒長肉去瘀治惡瘡腫毒及入膏藥為外科必用之物

主治參互

單用傳瘡能止痛長肉生肌 入一切膏藥貼惡瘡

腫毒 仲景柴胡加龍骨牡蠣湯治傷寒八九日下
之胸滿煩驚小便不利譫語身重者鉛丹龍骨柴胡
牡蠣黃芩生薑人參桂枝茯苓各一兩半半夏二合半
大黃二兩棗六枚以水八升煮取四升內大黃更煮
兩沸去渣溫服一升 集驗方治吐逆不止碧霞
丹黃丹四兩米醋半升煎乾炭火三秤就銚內煨紅
冷定為末粟米飯丸梧子大每服七丸醋湯下 劉
涓子鬼遺方小兒瘰癧壯熱不寒黃丹二錢蜜水和

服冷者酒服名鬼哭丹 痘癩方痘癩生翳黃丹輕

粉等分為末吹少許入耳內左患吹右右患吹左

子母秘錄小兒重舌黃丹一豆大安舌下 普濟方

小兒口瘡糜爛黃丹一錢生蜜一兩相和蒸黑每以

雞毛蘸搽甚效 集玄方金瘡出血不止以藥速合

則內潰傷肉只以黃丹滑石等分為末傅之 陸氏

積德堂方血風腫瘡黃丹一兩黃蠟一兩香油五錢

熬膏先以蔥椒湯洗貼之 集效方遠近臙瘡黃丹

水飛炒黃補酒浸七日焙各一兩輕粉半兩研細以
苦茶洗淨輕粉填滿次用黃丹護之外以棗末攤膏
貼之勿揭動一七見效

簡誤

吐逆由於胃虛及因寒發吐者皆不宜服

鉛味甘無毒鎮心安神治傷寒毒氣反胃嘔噦蛇蝎所
咬炙熱之

疏○鉛稟先天壬癸之氣以生一者數之始水者物

之初故曰天一生水中含生氣為萬物之先金丹之
母八石之祖五金之寶壬金為清癸水為濁清為陽
氣濁為陰質陽氣為生陰質有毒範以法象招攝陰
陽烹煉得宜是成丹藥餌之仙去生氣之初味固應
甘潤下之性無毒可知心藏神而法火寧謐則安妄
炎則病重而潤下使水火既濟而不妄炎故主鎮心
安神傷寒毒氣者即陽證執毒也先天真水性含生
氣而屬至陰故能解之也反胃嘔噦者火氣上浮陰

陽將離故氣逆升而發嘔噦也茲得鎮墜以下之則陽火歸元而前病自止矣蛇蝎之毒無非熱氣諸毒得水而解故亦主之也五行萬物之中能解一切毒氣者無過天生氣土中冲氣鉛兼有之故為解諸毒之首藥也

主治參互

黑鉛入養正丹治一切上盛下虛孤陽發越上浮煩躁面赤恍惚驚惕嘔吐反胃等證用此以鎮墜陽氣

使火入陰分則上焦得寧而後可以隨證施治 入

黑錫丹治一切下元虛冷陽氣垂絕陰陽將離及沈

寒痼冷諸病 聖濟錄治小兒驚熱心肺積熱夜卧

多驚鉛霜牛黃各半分鐵粉一分研勻每服一字竹

瀝調下 普濟方驚風痼疾喉閉牙緊鉛白霜一字

蟾酥少許為末烏梅肉蘸藥於齧上搯之仍吹通關

藥良久便開 聖濟錄治消渴煩熱鉛白霜枯白礬

等分為末蜜丸芡實大綿裹含化嚥汁又方鉛白霜

一兩黃消石一兩為末每冷水服一錢 喉痺腫痛
鉛白霜甘草各半兩青黛一兩為末醋糊丸芡子大
每含嚥一丸立效 宣明方治口疳齩爛氣臭血出
不拘大人小兒鉛白霜銅綠各二錢白礬豆許為末
掃之 普濟方梳髮令黑鉛霜包梳日日梳之勝於
染者

簡誤

鉛性沈重未經烹煉癸水之陰質尚存多服能損傷

心脾蓋金石與人身氣血異悟真篇云非類難為巧
是已凡脾胃虛寒陽火不足飲食不化下部陰溼諸
證法咸忌之

粉錫味辛寒無毒主伏尸毒螫殺三蟲去鼈瘕療惡瘡

墮胎止小便利

一名鉛粉 一名
胡粉 一名官粉

疏○粉錫陶隱居云即化鉛所作胡粉也其味辛氣
寒無毒體用與鉛相似性善殺蟲故去伏尸三蟲鼈
瘕寒能解熱毒故療惡瘡毒螫重而下降故能墮胎

澀而黏膩故止小便利甄權主積聚不消炒焦止小
兒疳痢藏器主久痢成疳和雞子白服以糞黑為度
皆為其消積殺蟲止痢也 附李時珍云胡粉即鉛
之變黑為白者也其用雖與鉛及黃丹同內有豆粉
蛤粉雜之止能入氣分不能入血分此為稍異人服
食之則大便色黑者此乃還其本質所為色壞還為
鉛也亦可入膏藥代黃丹用

主治參互

肘後方勞復食復欲死者水調胡粉少許與之 子

母秘錄小兒腹脹或腹皮青色不速治須臾死胡粉

鹽熬色變以摩腹上 救急方杖瘡腫痛水粉一兩

赤石脂生一錢水銀一分以麻油杵成膏攤油紙貼

之肉消者填滿緊縛 備急方陰股常溼胡粉摻之

邵真人方黃水膿瘡官粉煨黃松香各三錢黃丹

一錢飛礬二錢為末香油二兩熬膏傳之 備急方

小兒疔瘡熬胡紛猪脂和塗 集簡方妬精陰瘡鉛

粉二錢銀杏七箇銅鈿內炒至銀杏黃去杏取粉出
火毒研搽效 聖惠方翻花惡瘡胡粉一兩臘脂一
兩為末鹽湯洗淨傅之日五次 孫氏集效方血風
癩瘡官粉四兩水調入碗內以蘄艾燒煙熏乾入乳
香少許同研香油調作隔紙膏反覆貼之 千金方
小兒丹毒唾和胡粉從外至內傅之 又方瘡傷水
溼胡粉炭灰等分脂和塗孔上水即出也 又方蝮
蝮尿瘡酢和胡粉塗之 直指方發背惡瘡諸癰腫

好錫粉二兩真麻油三兩慢火熬以柳枝急攪至滴水成珠入白膠末少許入甕器水浸二日油紙攤貼名神應膏

簡誤

胡粉雖能消疔逐積殺蟲止痢然其性冷走而不守脾胃虛弱者不宜用娠婦忌之

東壁土主下部瘡脫肛

疏○東壁土先得太陽真火之氣其氣溫和其味甘

無毒脾主四肢而惡溼下部生瘡溼氣侵脾也得陽氣之壯故能燥溼除瘡脫肛亦大腸溼熱所致甘溫而燥故亦主之藏器止洩痢霍亂煩悶者取其土能補脾胃溫能和中也得太陽初氣能祛暑溼之邪故又主溫瘧及猝中暑熱攪土漿與之即解

主治參互

甄權法同蜆殼為末傅豌豆瘡 肘後方藥毒煩悶欲死者東壁土調水三升頓飲之 通變要法解烏

頭毒不拘川烏草烏毒用多年陳壁土泡湯服之

外臺秘要肛門突出東壁土一升研末傅肛門頭出處以長皂莢炙熟互熨之 氣味甘溫性無偏至故不著簡誤

赤銅屑主賊風反折燒赤銅五斤內酒二斗中百遍服
疏○赤銅屑日華子云苦平微毒亦能接骨理傷功用與自然銅相等第其性有毒耳本經主賊風反折者風氣通於肝肝屬木金能平之故也藏器曰赤銅

屑能鐸人骨及六畜有損細研酒服直入骨損處六畜死後取骨視之猶有鐸痕可驗朝野僉載云定州崔務墮馬折足醫者取銅末和酒服之遂瘥及亡後十年改葬視其脛骨折處猶有銅束之也打熟銅不堪用

銅青平微毒治婦人血氣心痛合金瘡止血明目去膚赤息肉生銅皆有青青則銅之精華淘洗用

疏○銅稟土中陰氣以生青則其英華秀出於外所

結凡銅入地久或沃以鹹酸之味乃生青其義可見
矣本經氣平無毒然觀今人用入吐風痰藥應是酸
苦澀之味而氣則微寒也酸入肝而主斂故能止血
合金瘡風熱入肝經則目生膚翳息肉或赤爛淚出
苦寒能除風熱則所苦去而目自明矣本經又主婦
人血氣心痛者蓋苦能洩結而平則又兼辛散之義
也

主治參互

經驗方碧林丹治痰涎潮盛卒中不語及一身風癱
用生綠二兩研細水化去石慢火熬乾取辰日辰時
辰位上修合再研入麝香一分糯米粉糊丸彈子大
陰乾卒中者每丸作二服薄荷酒研下吐出青碧涎
瀉下惡物大效 又方口鼻疔瘡人中白一錢銅綠
三分研傅之 衛生易簡方爛弦風眼銅青水調塗
碗底以艾熏乾刮下塗爛處

簡誤

目痛膚翳不由風熱外侵而因於肝虛血少者非所

宜用

井底砂泥作至冷主治湯火燒瘡用之

疏○井底砂稟地中至陰之氣味甘而大寒者也故
本經主湯火燒瘡用又能療妊娠熱病取傅心下臍
及丹田可護胎無失 肘後方臥忽不寤勿以火照
火照之殺人但痛嚙其踵及足拇指甲際而多唾其
面以井底泥塗其目令人垂頭於井中呼其姓名便

甦

代赭石味苦甘寒無毒主鬼疰賊風蠱毒殺精物惡鬼
腹中毒邪氣女子赤沃漏下帶下百病產難胞衣不出
墮胎養血氣除五藏血脈中熱血痺血瘀大人小兒驚

氣入腹及陰痿不起

入藥煅赤醋淬三次研水飛過
用畏天雄附子乾薑為之使

疏○代赭石稟土中之陰氣以生本經味苦氣寒別
錄加甘無毒氣薄味厚陰也降也入手少陰足厥陰
經少陰為君主之官虛則氣怯而百邪易入或鬼疰

邪氣或精物惡鬼或驚氣入腹所自來矣得鎮重之性則心君泰定而幽暗破邪無從著矣其主五臟血脈中熱血痺血瘀賊風及女子赤沃漏下帶下百病皆肝心二經血熱所致甘寒能涼血故主如上諸證也甘寒又能解毒故主蠱毒腹中毒也經曰壯火食氣少火生氣火氣太盛則陰痿反不能起苦寒洩有餘之火所以能起陰痿也重而下墜故又主產難胞不出及墮胎也

主治參互

仲景旋覆代赭湯治傷寒汗吐下後心下痞鞭噫氣
不除者代赭一兩旋覆花三兩人參二兩生薑五兩
大棗十二枚半夏半升甘草三兩水一斗煮取六升
去滓再煮取三升温服一升日三直指方急慢驚
風弔眼撮口搐搦不定代赭石火燒醋淬七次細研
水飛日乾每服一錢或半錢煎真金湯調下連進三
服兒脚脛上有赤斑即是驚氣已出病當安也無者

不治如漫驚用冬瓜仁煎湯調亦妙 普濟方婦人
血崩代赭石煨為末白湯服二錢

簡誤

下部虛寒者不宜用陽虛陰痿者忌之

戎鹽味鹹寒無毒主明目目痛益氣堅肌骨去毒蝨心
腹痛溺血吐血齒舌血出一名胡鹽

一名青鹽

疏○戎鹽稟水中至陰之氣凝結而成不經煎煉而
生於涯埃坂墳之陰其味鹹氣寒無毒入手足少陰

經經曰熱淫於內制以鹹寒血熱則目痛不明鹹寒能入血除熱故主目痛明目也心腹痛者心虛而邪熱客之也吐血齒舌上出血者火迫血妄行溢出於上也鹹主潤下俾火氣不上炎則有坎離交之象焉故能主諸證也溺血者小腸熱也心與小腸為表裏心火降則小腸熱自除也經曰熱傷氣又曰腎主骨熱則氣散骨消筋緩鹹能入腎寒能除熱故主益氣堅肌骨也鹹為水化諸毒得水則解故又能去毒蠱

日華子云助水臟益精氣除五臟癥結心腹積聚者
取其入腎及軟堅除熱之功耳

主治叅互

仲景金匱方戎鹽湯治小便不通用戎鹽彈丸大一
枚茯苓半斤白朮二兩水煎服之 唐氏經驗方風
熱牙痛青鹽一斤槐枝半斤水四碗煎汁二碗煮鹽
至乾炒研日用揩齒洗目 普濟方風眼爛弦戎鹽
水化點之

地漿寒主解中毒煩悶

疏○地漿弘景云此掘地作坎以水沃其中攪令濁
俄頃取之以解中諸毒蓋取土為萬物之母諸毒遇
土則化故也山中有毒草人不識煮食之無不死又
楓樹蓴食之令人笑不止惟飲地漿皆瘥餘藥不能
救也

主治參互

聖惠方熱渴煩悶地漿一盞飲之 千金方中暑霍

亂不吐不利脹痛欲死地漿三五盞服即愈大忌米湯
金匱方中閉口椒毒吐白沫身冷欲死者地漿飲之
集玄方中砒霜毒地漿調玄明粉服之立解

自然銅味辛平無毒療折傷散血止痛破積聚生邕州
山巖中出銅處於坑中及石間採得方圓不定其色青

黃如銅不從鑛煉故號自然銅

入藥火煨醋淬七次研細水飛過用

疏○自然銅稟土金之氣以生故其味辛氣平無毒
乃入血行血續筋接骨之神藥也凡折傷則血瘀而

作痛辛能散瘀滯之血破積聚之氣則痛止而傷自和也大明主消瘀血排膿續筋骨治產後血邪安心止驚悸以酒磨服者可謂悉其用矣冠宗奭云有人以自然銅飼折翅胡雁後遂飛去今人打撲損傷研細水飛過同當歸沒藥各半錢以酒調服仍以手摩痛處即時見效

主治參互

同乳香沒藥麝蟲五銖古錢麻皮灰血竭胎骨作丸

煎當歸地黃續斷牛膝牡丹皮紅花濃湯送下治跌
撲損傷或金刃傷骨斷筋皆效

簡誤

雷公云石髓鉛即自然銅也凡使勿用方金牙其方
金牙真似石髓鉛若誤餌吐殺人石髓鉛色似乾銀
泥味微甘也凡使中病乃已不可過服以其有火金
之毒走散太甚

梁上塵主腹痛噎中惡鼻衄小兒軟瘡

疏○梁上塵乃是空中煙氣結成本經無氣味應是
辛苦之物辛能散苦能洩故主腹痛噎膈中惡也體
輕而上騰故入肺味辛而清熱故又主鼻衄及小兒
軟瘡也一名倒掛塵一名烏龍尾

主治參互

孫氏集效方喉痺乳蛾烏龍尾枯礬猪牙皂莢以鹽
炒黃等分為末或吹或點皆妙 一法用燈心以鹽
中苦鹵浸過入雞子殼中煨存性取出研細加龍腦

香一二分研勻明礬末五分同梁上倒掛塵五分青魚膽調點入喉治喉痺咽痛有效

礞石治食積不消留滯藏府宿食癥塊久不瘥及小兒食積羸瘦婦人積年食癥攻刺心腹一名青礞石

疏○礞石稟石中剛猛之性體重而降能消一切積聚痰結其味辛鹹氣平無毒辛主散結鹹主軟堅重主墜下故本經所主諸證皆出一貫也今世又以之治小兒驚痰喘急入滾痰丸治諸痰怪證

主治參互

王隱君養生主論滾痰丸通治痰為百病惟水瀉娠婦不宜服礞石焰硝各二兩煨過研飛曬乾一兩大黃酒蒸八兩前胡八兩沈香五錢為末水丸梧子大常服一二十九欲利大便則服一二百丸溫水下

簡誤

礞石消積滯墜痰涎誠為要藥然而攻擊太過性復沈墜凡積滯癥結脾胃壯實者可用虛弱者忌之小

兒驚痰食積實熱初發者可用虛寒久病者忌之如
王隱君所製滾痰丸謂百病皆生於痰不論虛實寒
熱槩用殊為未妥不知痰有二因因於脾胃不能運
化積滯生痰或多食酒麪溼熱之物以致膠固稠黏
咯唾難出者用之豁痰利竅除熱泄結應如桴鼓因
於陰虛火炎煎熬津液凝結為痰或發熱聲啞痰血
雜出者如誤投之則陰氣愈虛陽火反熾痰熱未退
而痺胃先為之敗矣可見前人立方不能無愆是在

後人善於簡擇耳

麥飯石

疏○麥飯石出自蘇頌圖經附於薑石條內因薑石有疔腫之用故引及之其味氣必與薑石相似但得火煨醋淬之後復有溫煖收斂之功昔呂子華秘方麥飯石膏治發背瘡神效取此石碎如棋子炭火燒赤投米醋中浸之良久又燒又浸如此十次研末極細如飛塵鹿角一具連腦骨者二三寸截之炭火燒

令煙盡即止白斂末與石末等分鹿角倍之用三年
米醋入銀石器內煎令魚目沸即下前藥不住手攪
熬一二時稀稠得所傾出待冷以鵝翎拂膏於腫上
四圍赤處中留腫頭洩氣如未膿即內消已作頭即
撮小已潰即排膿若病久肌肉爛落見出筋骨者即
塗細布上貼之乾即易逐日瘡口收斂但中膈不穴
者即無不瘥已潰者用時先以猪蹄湯洗去膿血挹
乾然後上藥其瘡切忌手觸動嫩肉仍不可以口氣

吹風及腋氣月經孕婦見之合藥時亦忌此等初時
一日一換十日後二日一換此藥要極細方有效若
不細塗之即痛也煨久亦無效臨用方煨煨過即研
若飛塵一二兩可治一癰疽矣

花乳石主金瘡止血又療產婦血暈惡血出陝華諸郡
色正黃形之大小方圓無定欲服者當以大火燒之金
瘡止血刮末傅之即合仍不作膿潰或名花蕊石

疏○花乳石本經無氣味詳其所主應是酸辛溫之

藥其功專於止血能使血化為水婦人血暈惡血上薄也消化惡血則暈自止矣以酸斂之氣復能化瘀血故傳金瘡即合仍不作膿也

主治參互

葛可久十藥神書花乳石散治五內崩損噴血出升斗用此治之花蕊石煨存性研如粉以童子小便一鍾男入酒一半女入醋一半令溫食後調服三錢甚者五錢能使瘀血化為黃水後以獨參湯補之按此

石性溫味辛又加火煨虛勞吐血多是火炎迫血上行於藥性非宜除是膈上原有瘀血停凝者乃可暫用亦須多服童便獨參湯乃肺熱咳嗽所忌尤不宜於虛勞內熱火炎之人戒之戒之 和劑局方花蕊石散治一切金刃箭鏃傷及打撲傷損狗咬至死者急以藥摻傷處其血化為黃水再摻便活更不疼痛如內損血入臟腑熱童便入酒少許熱調一錢服立效 婦人產後敗血不盡血暈惡血奔心胎死腹中

胞衣不下至死但心頭溫煖者急以童便調服一錢
取下惡物愈若膈上有血化為黃水即時吐出或隨
小便出甚效用硫黃四兩花蕊石一兩並為粗末以
膠泥固濟日乾瓦礫一箇盛之泥封口烘乾安在四
方磚上書八卦五行字炭一秤簇匝從巳午時
自下生火煨至炭消冷定取出為細末甕瓶收貯封
固取用無時

簡誤

無瘀血停留者不宜內服不由內傷血凝胸膈板痛
而因火炎血溢以致吐血者忌之

蓬砂味苦辛煖無毒消痰止嗽破癥結喉痺及錐金銀
用一名鵬砂

疏○蓬砂出於西南番採取煎淋而結亦如硝石礪
砂之類本經味苦辛氣煖無毒然詳其用味應有鹹
氣亦微煖色白而體輕能解上焦胸膈肺分之痰熱
辛能散苦能洩鹹能軟故主消痰止嗽喉痺及破癥

結也寇宗奭云含化嚙津治喉中腫痛膈上痰熱初
覺便治不能成喉痺也兼能去口氣消障翳除噎膈
反胃積塊瘀肉陰癩骨硬惡瘡折傷及口齒諸病

主治參互

同龍腦香人中白青黛為末傅口舌瘡效 經驗方
咽喉腫痛破棺丹用蓬砂白梅等分搗丸芡子大每
噙化一九 集玄方小兒陰癩腫大不消硼砂一分
水研塗之大效 直指方弩肉瘰突南硼砂黃色者

一錢龍腦香少許研末燈草蘸點之

簡誤

蓬砂其性能柔五金去垢膩剋削為用消散為能宜
攻有餘難施不足此暫用之藥非久服之劑

鉛霜冷無毒消痰止驚悸解酒毒療胸膈煩悶中風痰

寶止渴

一名鉛白霜用鉛雜水銀十五分之一
合鍊作片置醋窰中密封經久成霜

疏○鉛霜乃鉛假汞氣交感因醋以拔其英華所結
道家謂之神符白雪其味甘酸氣大寒無毒凡中風

驚悸未有不因痰熱所生胸膈煩悶多渴亦火熱炎
灼所致甘寒能除熱生津則痰結消驚悸平風自愈
也其主解酒毒者亦取其除熱生津之意耳并治吐
逆鎮驚去怯黑鬚髮

主治參互

諸方俱見鉛條下 簡要濟衆治室女月露滯澀心
煩恍惚鉛白霜細研為散每服一錢地黃汁一合調
下 十全普救方治鼻衄鉛白霜為末取新汲水調

服一字

簡誤

鉛霜墜痰去熱定驚癇止吐逆皆有奇效然其性極冷非久服常用之物病已即去之胃弱脾虛腸滑者不宜用風寒咳嗽多痰者并忌之

古文錢平治翳障明目療風赤眼鹽鹵浸用婦人橫逆產心腹痛月隔五淋燒以醋淬用

疏○古文錢其金毒火毒悉去性應平無毒而冠宗

爽云古錢其銅焦亦有毒不知本草內赤銅之毒已
微況古錢又多於古穴坑塹中得之歷年既久毒性
必失甚則有但存形質者其味辛氣平平即涼也目
赤翳障肝經風熱也辛涼能散風熱則翳障赤痛除
目自明矣婦人生產橫逆者血氣壅塞道路不開也
心腹痛者亦氣血結聚也月隔者月事不來胞脈閉
也五淋者衝任熱壅也此藥能走下焦陰分散凝滯
之氣血開壅塞之道路則諸證無不除矣又能主跌


撲損傷其為散凝滯之藥無疑

主治叅互

同自然銅胎骨塵蟲血竭無名異黃荊子沒藥乳香
狗骨治跌撲損傷及金刃傷神效 青囊錄跌撲損
傷半兩錢五箇火煨醋淬四十九次甜瓜子五錢真
珠二錢研末每服一字好酒調隨上下食前後 古
方麥斗散治一切傷損自然銅煨一兩古文錢煨一
兩麝香五分為末每服五分酒下

簡誤

其味辛涼但能治風熱眼有佐以薑汁點眼者即從
治之意借其熱以拔出火毒也如肝胃虛而內障生
花者必不宜用



神農本草經疏卷五

欽定四庫全書

子部

神農本草經疏卷六

詳校官太醫院醫士臣趙蒞

編修臣倉聖脈覆勘

總校官進士臣繆琪

校對官中書臣吳俊

謄錄監生臣羅翮遠

欽定四庫全書

神農本草經疏卷六

明 繆希雍 撰

草部上品之上

總八十七種今疏其要者三十二種

黃精

菖蒲

甘菊花

人參

天門冬

甘草

乾地黄

木

菟絲子

牛膝

羌蔚子

姜藜

苳

柴胡字

麥門冬

獨活

羌活附

升麻

車前子

木香

薯蕷

今呼山藥

薏苡仁

澤瀉

遠志

草龍膽

細辛

石斛

巴戟天

菴藺子

卷柏

辟虺雷

藥王

草犀根

百草花

黃精味甘平無毒主補中益氣除風濕安五藏久服輕身延年不饑黃帝曰太陽之草名曰黃精餌之可以長生

疏○黃精君純得土之冲氣而稟乎季春之令故味甘氣和性無毒其色正黃味厚氣薄土位乎中脾胃治中焦故補中脾土為後天生氣之源故益氣中氣強脾胃實則風濕之邪不能干故除風濕五臟之氣皆稟胃氣以生胃氣者即後天之氣也斯氣盛則五臟

皆實實則安故安五臟臟安則氣血精三者益盛氣
滿則不饑久服輕身延年著其為効之極功也雖非
治療之所急而為養性之上藥故仙經累贊其能服
餌駐顏久而彌勝矣

主治叅互

黃精同漆葉桑椹何首烏茅山朮作丸餌可以變白
久之殺三蟲能使足溫而不寒 同朮久服可輕身
涉險不饑 同地黃天門冬釀酒可去風益血氣

簡誤

雷公云凡使勿用鈎吻真似黃精只是葉有毛鈎子
二箇是別認處若誤服害人黃精葉似竹葉以溪水
洗淨後蒸從已至子竹刀薄切爆乾用

菖蒲味辛溫無毒主風寒濕痺效逆上氣開心孔補五
藏通九竅明耳目出音聲主耳聾癱瘡溫腸胃止小便
利四肢濕痺不得屈伸小兒溫瘡身積熱不解可作浴
湯久服輕身聰明耳目不忘不迷惑延年益心智高志

不老

一寸九節者良露根者不可用忌
飴糖羊肉不可犯鐵令人吐逆

疏○菖蒲君正稟孟夏六陽之氣而合金之辛味以生者也其味苦辛其氣大溫陽精芳草故無毒陽氣開發外充百骸辛能四達以散邪結此通利心脾二經之要藥也蓋苦可燥濕溫能辟寒辛可散結風寒濕三者合而成痺此去三邪痺自愈矣陽氣開發芬芳輕揚氣重于味辛兼橫走故能下氣開心效逆者氣逆之候也下氣則效逆上氣可去五臟之壅遏既

徹則九竅應之而通故聰明耳目出音聲主耳聾辛
以散之故治癰瘡氣味辛溫氣厚發熱故溫腸胃膀胱
虛寒則小便不禁腸胃既溫則膀胱與焉故止小
便脾主四肢脾濕既祛則四肢濕痺不得屈伸自利
山嵐瘴氣最能使小兒發瘡寒濕之甚莫過山嵐既
散其邪則病本已拔瘡焉得而不已焉作浴湯及久
服輕身者除濕之驗也不迷惑益心智高志者心竅
開利也其曰補五臟延年者單指巖棲脩煉之士辟

穀服餌之用以其助發陽氣辟除陰嵐兼可參合養性諸藥如黃精青黏地黃天門冬之屬資其宣導臻乎太和故亦為仙經要藥至于世俗之人五慾熾然六淫迭至詎可窮年卒歲久餌偏燥之物乎

主治參互

菖蒲同熟地黃黃檗作丸治腎虛耳聾若中年預服可使老而聰聰 同二朮木瓜薏仁石斛萆薢黃檗為除濕強步之要藥兼治下部膿窠濕瘡如神 佐

人參麥門冬酸棗仁茯神遠志生熟地黃為補心之劑如心氣鬱結者加沈香能益火以開心 兼辟蚤

簡誤

雷公云凡使勿用泥菖夏菖其二件相似如竹根鞭形黑氣穢味腥不堪用凡使採石上生者根條嫩黃緊硬節稠一寸有九節者是真也採得後用銅刀括去黃黑皮硬節一重了用嫩桑條相拌蒸出爆乾去

桑條剉用

菊花味甘平無毒主風頭眩腫痛目欲脫淚出皮膚
死肌惡風濕痺療腰痛去來陶陶除胸中煩熱安腸胃
利五脈調四肢久服利血氣輕身耐老延年

疏○菊花發生於春長養於夏秀英於秋而資味乎
土歷三時之氣得天地之清獨稟金精專制風木故
為去風之要藥苦可洩熱甘能益血甘可解毒平則
兼辛故亦散結苦入心小腸甘入脾胃平辛走肝膽

兼入肺與大腸其主風頭眩腫痛目欲脫淚出皮膚
死肌惡風濕痺者諸風掉眩皆屬肝木風藥先入肝
肝開竅于目風為陽邪勢必走上血虛則熱熱則生
風風火相搏故也腰痛去來陶陶者乃血虛氣滯之
候苦以洩滯結甘以益血脈辛平以散虛熱也其除
胸中煩熱者心主血虛則病煩陰虛則熱收于內故
熱在胸中血益則陰生陰生則煩止苦辛能泄熱故
煩熱並解安腸胃利五脈調四肢利血氣者即除熱

祛風益血入心入脾入肝之驗也久服輕身耐老延年者物久則力專力專則氣化化則變常其釀酒延齡和藥變白皆服餌專氣之功故亦為仙經所錄矣生搗最治疔瘡血線疔猶為要藥疔者風火之毒也三六九十二月採葉莖花根四物並陰乾百日等分搗末酒調下錢許又可蜜丸如桐子大每七九日三服皆酒吞一年變白二年齒生三年返老仙人王子喬方也

主治參互

甘菊花祛風要藥風木通肝肝開竅于目故為明目
之主同地黃黃檗枸杞子白蒺藜五味子山茱萸當
歸羚羊角羊肝治肝腎俱虛目痛加決明子木賊草
穀精草柴胡可以去外翳 同黃連玄參甘草生地
黃荊芥穗決明子連翹桔梗柴胡川芎羌活童便可
治風熱目痛 君川芎細辛藁本當歸生熟地黃天
麥門冬白芍藥甘草童便治血虛頭痛亦主頭眩暈

因痰結而作者無痰藥不效 與枸杞子相對蜜丸
久服則終身無目疾兼不中風及生疔疽 連根生
用為君加紫花地丁益母草金銀花半枝連貝母連
翹生地黃括樓根白芷白及蒼耳子夏枯草可治疔
瘡甚者以蟾酥丸發汗大便閉者汗後以玉樞丹下
之如無玉樞丹以大戟加蚤休棗肉丸服三錢必下
矣忌甘草犯之則死為大戟也

人參味甘微寒微溫無毒主補五藏安精神定魂魄止

驚悸除邪氣明目開心益智療腸胃中冷心腹鼓痛胸脇逆滿霍亂吐逆調中止消渴通血脈破堅積令人不忘久服輕身延年

茯苓為之使

疏○人參得土中清陽之氣稟春升少陽之令而生故味甘微寒而無毒氣味均齊不厚不薄升多于降潔古謂其氣味俱薄浮而升陽中之陽也又曰陽中微陰蓋亦指其生長真元之氣而言歟神農微寒別錄微溫二義相蒙世鮮解者蓋微寒者春之寒也微

溫者亦春之溫也神農直指所稟故曰微寒別錄兼
言功用故又曰微溫既云微矣寒不甚寒則近于溫
溫不甚溫則近于寒故知寒溫雖別言微則一也以
言乎天則得其生生升發之氣以言乎地則得其清
陽至和之精狀類人形上應瑤光故能回陽氣于垂
絕却虛邪于俄頃功魁羣草力等九丹矣其主治也
則補五臟蓋臟雖有五以言乎生氣之流通則一也
益真氣則五臟皆補矣其曰安精神定魂魄止驚悸

開心益智者以心藏神肝藏魂肺藏魄腎藏精與志
脾藏意與智故也心腎虛則精神不安矣肝肺虛則
魂魄不定矣驚悸者心脾二經之病也心脾虛則驚
悸心脾之氣強則心竅通利能思而智益深矣邪氣
之所以久留而不去者無他真氣虛則不能敵故留
連而不解也茲得補而真元充實則邪自不能容譬
諸君子當陽則小人自退清陽之氣下陷則耳目不
聰明兼之目得血而能視陽生則陰長故明目真氣

內虛故腸胃中冷氣旺陽回則不冷矣心腹鼓痛者
心脾虛故也二臟得補其痛自止所謂按之快然者
是也故經曰可按者虛也不可按者實也不可按者
勿用胸脇逆滿者氣不歸元也得補則氣實而歸元
也脾胃俱虛則物停滯而邪客之故霍亂吐逆也補
助脾胃之元氣則二證自除調中者脾胃治中焦脾得
補則中自調矣消渴者津液不足之候也氣回則津
液生津液生則渴自止矣通血脈者血不自行氣壯

則行故通血脈破堅積者真氣不足則不能健行而磨物日積月累遂成堅積譬夫磨管納物無力則不轉不轉則停積矣脾主消化真陽之氣回則脾強而能消何堅積之不磨哉令人不忘者心主記脾主思心脾二臟之精氣滿則能慮而不忘矣久服輕身延年者純陽則充舉氣積則身輕五臟皆實延年可知矣斯皆敦本之論也

主治參互

人參補五臟陽氣之君藥開胃氣之神品 同大棗

白芍藥龍眼肉甘草酸棗仁補脾陰 腎氣衰陽痿

以之為君加鹿茸肉蓯蓉巴戟天五味子麥門冬菟

絲子山茱萸地黃枸杞杜仲柏子仁乃扶衰之要劑

兼令人有子 君藿香木瓜橘紅治胃虛弱嘔吐反

胃如妊娠嘔吐加竹茹枇杷葉 同白朮吳茱萸治

脾泄久不止 君五味子吳茱萸補骨脂肉豆蔻治

腎泄 同白芍藥炙甘草治血虛腹痛鼓痛 同乾

薑白朮炙甘草治中寒泄瀉下利清穀甚則加肉桂
附子 同附子乾薑肉桂治寒厥指爪青黯便清蹇
卧 同附子五味子治陽氣脫溫腸胃中冷 君五
味子麥門冬治肺虛氣喘夏月服之益氣除熱止消
渴名生脈散 加白朮又治中暑傷氣倦怠 同沈
水香白芍藥治真氣虛氣不歸元因而胸脇逆滿
同茯苓遠志益智棗仁麥門冬治精神恍惚魂魄不
定驚悸 同沈水香茯神治心虛邪客之作痛 同

鹿角膠杜仲續斷當歸地黃蘇木治負重努力內傷
失血去蘇木加生地黃治胎漏不安 同黃耆白芍

藥五味子治汗多亡陽 同蘇木麥門冬治產後氣

喘 在白虎湯治勞傷元氣人患熱病渴甚并頭疼

在敗毒散治氣虛人患四時不正傷寒 在參蘇

飲治肺虛人傷風 同鼈甲青皮乾漆麝蟲肉桂牡

蠣射于消瘡母 同甘菊花當歸地黃枸杞子蒺藜

甘草柴胡則明目 同黃連紅麴白芍藥滑石末升

麻治滯下腹痛赤色 同黃連烏梅蓮肉升麻滑石

末肉豆蔻治滯下久不止 同白朮木瓜茯苓藿香

炙甘草止虛煩躁 同牛黃犀角天竺黃鈎藤鈎丹

砂雄黃真珠茯神遠志治驚癇 同地黃阿膠麥門

冬山茱萸五味子續斷杜仲治血崩加牛膝大薊鹿

角膠治血淋 同橘皮紫蘇木瓜白朮竹茹治惡阻

安胎熱多者去朮紫蘇加麥門冬 同五加皮白蘚

皮石南葉石斛秦艸木瓜薏苡仁草薺牛膝沈香菖

蒲二朮治痺 同黃檗黃耆白朮五味子麥門冬木

瓜白芍藥薏苡仁白茯苓治痿 同附子白朮芍藥

甘草茯苓治慢驚慢脾風 同白朮黃耆芍藥治自

汗 同生薑皮各兩許水煎露一宿五更溫服治氣

虛久瘧不止 同蘇木當歸童便治產後血暈 同

石菖蒲蓮肉等分水煎治產後不語 同乳香丹砂

雞子白薑汁三匙調勻別用當歸兩許煎濃同吞治

橫生倒養難產神効 同附子肉桂麥門冬五味子

治房勞過度脫陽欲絕下部虛冷 同黃耆天門冬
五味子牛膝枸杞菖蒲治中風不語

簡誤

人參論其功能之廣具如本經所說信非虛語第其
性亦有所不宜世之錄其長者或遺其短摘其瑕者
并棄其瑜是以或當用而後時或非宜而妄設不蒙
其利徒見其害二者之誤其失則一遂使良藥不見
信于世粗工互騰其口說惜哉豈知人參本補五臟

真陽之氣者也。若夫虛羸，疴怯，勞役，饑飽，所傷努力，失血，以致陽氣短乏，陷入陰分，發熱，倦怠，四肢無力，或中熱傷暑，暑傷氣，無氣以動，或嘔吐泄瀉，霍亂轉筋，胃弱不能食，脾虛不磨食，或真陽衰少，腎氣乏絕，陽道不舉，完穀不化，下利，清水，中風，失音，產後氣喘，小兒慢驚，吐瀉不止，痘後氣虛，潰瘍，長肉等證，投之靡不立効。惟不利于肺家有熱，咳嗽，吐痰，吐血，衄血，齒衄，內熱，骨蒸，勞瘵，陰虛火動之候。蓋肺者華蓋之

臟也位乎上象天屬金喜清肅而惡煩熱真氣無虧
則寧謐清淨以受生氣之熏蒸而朝百脈苟縱恣情
慾虧損真陰火空則發熱起于下炎爍乎上則肺先
受之火乃肺之賊邪邪氣勝則實實則肺熱鬱結為
痰喉痒而發嗽血熱妄行溢出上竅王好古所謂肺
熱還傷肺是已又有痧癘初發身雖熱而斑點未形
傷寒始作形證未定而邪熱方熾若誤投之鮮克免
者斯皆實實之害非藥可解經曰實實虛虛損不足

而益有餘如是者醫殺之耳可不戒哉可不慎哉

天門冬味甘平大寒無毒主諸暴風濕偏痺強骨髓
殺三蟲去伏尸保定肺氣去寒熱養肌膚益氣力利小
便冷而能補久服輕身益氣延年不饑

忌鯉魚

疏○天門冬正稟大寒初之氣以生得地之陰精獨
厚味雖微苦甘而帶辛其氣大寒其性無毒要以甘
多者為勝味厚于氣陰也降也除肺腎虛熱之要藥
也其主諸暴風濕偏痺殺三蟲去伏尸保定肺氣去

寒熱者蓋以熱則生風暴則屬火其言濕者乃濕熱之謂苦以洩濕寒以除熱熱去則風止濕洩則痺瘰偏痺者濕熱所致也強骨髓者腎為作強之官而主骨濕熱不去下流客腎能使人骨痿腎欲堅急食苦以堅之天門冬黃蘗之屬是已且腎者水臟也平則溫而堅虛則熱而軟味苦氣寒正入腎而除熱堅軟故強骨也三蟲伏尸必生于脾腎俱虛內熱氣弱之人若能殺蟲辛能散結故殺三蟲而除伏尸也肺為

華蓋之臟喜清肅而惡煩熱亦畏濕熱平則安和發
聲清亮一受火熱則為賊邪所干而痰壅欬逆氣喘
吐血寒熱聲啞之證出焉熱洩則痰散而肺清肺清
則津液流通氣得下降而諸證自止矣養肌膚益氣
力利小便者肺主皮毛脾氣散精上歸于肺通調水
道下輸膀胱又肺為水之上源朝百脈而主氣熱邪
退則肺得所養故能養肌膚益氣力利小便也冷而
能補者熱盛則肺腎俱虛除虛熱即補肺腎也久服

輕身益氣延年不饑者熱退則水足水足則精固精
固則腎氣益實腎為先天真氣之源腎實骨強延齡
可知已要之道書所錄皆指遺世獨立辟穀服餌之
流者設非謂恒人亦可望此也

主治參互

痰之標在脾胃與肺其本在腎若非腎家有火炎上
薄肺煎熬津液而成黏膩則痰何自而生耶天門冬
味苦氣大寒能清熱保肺下通于腎故同麥門冬百

部桑白皮枇杷葉玄參貝母童便竹瀝為清肺消痰
止嗽必用之藥 同地黄麥門冬五味子黃蘗車前
子枸杞牛膝為丸補陰除熱滋腎家燥脾胃弱者加
山藥白茯苓砂仁以佐之 同麥門冬五味子熬膏
入煉蜜益肺甚妙亦治消渴 同甘菊花釀酒除一
切風能愈大風病水煮則除風熱兼除煩悶 同生
地黄麥門冬白芍藥鼈甲牛膝杜仲續斷童便治吐
血 同乾漆百部鼈甲青黛獺肝象膽殺三蟲而除

勞瘵 同薏苡仁桑黃白及紫苑百部百合能除肺
痿吐膿血 同青蒿鼈甲麥門冬銀柴胡牛膝白芍
藥地骨皮五味子能治婦人骨蒸 同麻子仁麥門
冬生地黃童便能除大腸熱燥胃強者略加桃仁
同熟地黃胡麻仁和蜜久服駐顏不饑

簡誤

天門冬味苦平辛其氣大寒若因陰虛水涸火起下
焦上炎于肺發為痰喘者誠哉要藥也然大寒而苦

不利脾胃陰虛之人脾胃多弱又以苦寒損其胃氣
以致泄瀉惡食則危殆矣何者後天元氣生於胃氣
五臟之氣皆因之以為盛衰者也強則喜食而甘味
弱則惡食而不甘味陰虛精絕之病正賴脾胃之氣
強能納能消以滋精氣若脾胃先困則是後天生氣
之源絕矣九餌雖佳總統於食湯液雖妙終屬於飲
若非胃氣無損焉能納而消之以各歸其根奏平定
之功哉必不得已當以薏苡仁白茯苓山藥甘草白

芍藥同用或用麥門冬以代之可也誤用之必泄

甘草味甘平無毒主五藏六腑寒熱邪氣堅筋骨長肌肉倍力金瘡腫解毒溫中下氣煩滿短氣傷藏欬止

渴通經脈利氣血解百藥毒為九土之精安和七十二

種石一千二百種草久服輕身延年二月八月除日採

根暴乾十日成

木苦參為使反大戟芫花甘遂
海藻惡遠志忌豬肉令人陰痿

疏○甘草味甘氣平無毒正稟土中沖和之陽氣以

生故別錄稱之為九土之精可升可降陰中陽也主

五臟六腑寒熱邪氣堅筋骨者以其得土中沖陽之氣味甘平性和緩故能解一切毒氣安臟腑除邪熱也五臟之寒熱邪氣既解則臟氣和而真氣生氣日以盛故筋骨堅長肌肉倍力者甘能益脾胃主肌肉兼主四肢脾強則四肢生力故長肌肉倍力也主金瘡癰者甘入血分而能緩中且傷則熱熱而後癰甘溫益血而除熱煩熱解故癰散也溫中下氣者甘味屬土土位乎中故溫中甘能緩中散結故下氣煩滿

短氣者是勞傷內乏陽氣不足故虛而煩滿短氣甘
溫能益血除大熱助氣故煩滿短氣並除也甘平且
和和能理傷故治傷臟肺苦氣上逆嗽乃肺病甘以
緩之故治咳嗽血不足則內熱內熱則津液衰少而
作渴甘能入脾益血故止渴血虛則經脈不通能益
血則經脈自通矣甘能益血而溫氣分故利血氣其
解一切金石草木蟲魚禽獸之毒者凡毒遇土則化
甘草為九土之精故能解諸毒也久服輕身延年者

為其益血安和五臟也

主治參互

諸毒遇土則化甘草為土精故能化毒解一切邪氣
佐黃耆防風能運毒走表為痘疹氣血兩虛者首尾
必資之劑 得白芍藥則補脾甲已化土故也 同
人參黃耆白朮大棗當歸身麥門冬加升麻柴胡為
補中益氣藥專理饑飽勞役內傷陽氣下陷發熱
同人參乾薑肉桂則溫中 同麥門冬蘇子枇杷葉

則下氣 同黃連芍藥升麻滑石解熱毒滯下 同

桔梗玄參鼠黏子括樓根清利咽喉虛熱 同人參

菖蒲益智龍眼肉遠志治健忘 同麥門冬石膏竹

葉知母除煩悶躁渴頭疼解肌 同紫花地丁金銀

花甘菊夏枯草益母草貝母白及白芷消一切疔腫

同川黃連止小兒胎毒驚癇 同黃連木通赤芍

藥生地黃瀉心經有餘之火 同預知子貫衆解一

切毒蠱 單用水炙百偏煎熬舂許治懸癰如神

灸則補傷寒病瘥後血虛

簡誤

甘能緩中故中滿者忌之嘔家忌甘酒家亦忌甘諸
濕腫滿及脹滿病咸不宜服

乾地黄味甘苦寒無毒主折跌絕筋傷中逐血痺填骨
髓長肌肉作湯除寒熱積聚除痺主男子五勞七傷女
子傷中胞漏下血破惡血溺血利大小腸去胃中宿食
飽力斷絕補五藏內傷不足通血脈益氣力利耳目生

者猶良 生地黃大寒主婦人崩中血不止及產後血
上薄心悶絕傷身胎動下血胎不落墮墜踈折瘀血留
血鼻衄吐血皆擣飲之久服輕身不老

採得即用者為
生曬乾收者為

乾以法製
過者為熟

疏○乾地黃稟仲冬之氣以生黃者土之正色兼稟
地之和氣故味甘氣寒而無毒別錄又云苦者以其
兼入心脾也此乃補腎家之要藥益陰血之上品本
經主折跌絕筋傷中逐血痺者肝藏血而主筋補肝

則榮血調榮血調則傷中自去痺者血分之病因虛而風寒濕邪客之故筋拘攣而痛養血和肝痺必瘳矣作湯除寒熱積聚除痺者血和則結散故諸證自除也其曰填骨髓長肌肉主男子五勞七傷者地黃為至陰之藥正補腎水真陰而益血血王則髓滿陰足則肌肉自長五勞七傷皆陰虛內熱真陰不足之候甘寒能除內熱而益精髓故勞傷自除也女子傷中胞漏下血者陰虛則火熾而血熱火能銷物造化

自然之道也涼血益血則胞漏自止矣下血者血熱也涼血則下血自愈榮血滯則為惡血生地黃能行血故破惡血溺血者腎與小腸熱也益陰涼血則溺血自止二便自利矣胃與足陽明胃家濕熱盛則食不消生地黃能瀉脾胃中濕熱濕熱去而脾胃安則宿食自去飽而努力則腸胃筋脈有絕傷之患形屬血故行血益血則諸傷自理矣五臟咸屬陰陰即精血補精血則五臟內傷不足自愈矣通血脈益氣力

利耳目者皆臟安之驗也又主婦人崩中血不止及
產後血上薄心悶絕傷身胎動下血胎不落墜墜踈
折瘀血留血衄血吐血生者搗汁飲之皆涼血行血
之功也久服輕身不老則益陰填髓補五臟之能事
畢矣又按日華子云助心膽氣強筋骨長志安魂定
魄除驚悸者膽為五臟六腑之首行春升之氣故十
一臟皆取決於膽為中正之官地黃入手足少陰亦
入足厥陰心與肝為子母之臟膽為肝之腑肝主筋

腎主骨腎藏精與志肝藏魂肺藏魄心膽二經虛則
病驚悸生地黄為手少陰之要藥能涼心助膽補肝
心涼則熱不薄肺肝清寧則魂魄自定膽氣壯則
驚自除肝腎足則筋骨自強心腎交濟則志自長矣

主治叅互

生地黄同大小薊各半俱搗取自然汁和童便飲治
一切血熱妄行吐血齒鼻衄神効 取汁和麩作飴
飴冷淘治蟲心痛 同苧麻根搗汁碗許加炒砂仁

末三錢治胎動下血 同麥門冬治產後煩悶 同

當歸赤芍藥乳香沒藥肉桂炒黃荊子末治一切跌

打折傷瘀血作痛 同金銀花甘草荊芥穗玄參連

翹黃槩地榆白芷木通治血分濕熱生膿瘡痛甚者

濃煎恣飲立差 入瓊玉膏為陰陽兩補之要劑

乾地黃同沙苑蒺藜肉蓯蓉鹿茸山茱萸五味子能

益男子精 同人參枸杞五味子麥門冬鹿茸車前

子覆盆子兔絲子多服令人有子 得青蒿子鼈甲

銀柴胡沙參天麥二冬黃檗甘草地骨皮牡丹皮白芍藥牛膝能治骨蒸勞熱 同人參遠志麥門冬酸棗仁栝子仁茯神甘草治心虛驚悸怔忡健忘 同黃耆黃連黃檗酸棗仁五味子白芍藥麥門冬龍眼肉牡蠣粉治盜汗久不止 得麥門冬五味子牛膝枸杞子車前子阿膠天門冬治溺血 同人參麥門冬五味子牛膝漬酒能益氣力逐及奔馬 同當歸白芍藥川芎阿膠鹿角膠能益母安胎 同砂仁治

胎動下血腰痛 同青蒿地骨皮麥門冬白芍藥山

茱萸枇杷葉治婦人月事先期 同生薑治產後中

風 同當歸川芎蒲黃黑豆炒炮薑澤蘭益母牛膝

續斷杜仲鹿角膠治一切產後血虛發熱 得肉桂

及乳香沒藥五靈脂治兒枕痛夏月去桂 同芍藥

當歸川芎阿膠蘄艾香附治經事不調 同甘菊花

女貞實枸杞子白蒺藜能明目益精 同黃連連翹

薄荷甘草甘菊花木通治目暴赤痛 同鹿茸五味

子人參鍾乳粉白茯苓能生齒 同何首烏桑椹甘
菊鱧腸蜀椒能烏鬚髮

簡誤

生地黄性大寒凡產後惡食作瀉雖見發熱惡露作
痛不可用誤用則泄不止胃氣者後天元氣之本也
胃困則飲食不運精血不生虛熱何自而退故并當
歸忌之凡見此證宜多加炮薑桂心人參必自愈凡
陰虛咳嗽內熱骨蒸或吐血等候一見脾胃薄弱大

便不實或天明腎泄產後洩瀉產後不食俱禁用生
地黃當歸誤則同於前轍慎之凡胸膈多痰氣道不
利升降窒塞藥宜通而不宜滯湯液中禁入地黃

木味苦甘溫無毒主風寒濕痺死肌痲疸止汗除熱消
食主大風在身面風眩頭痛目淚出消痰水逐皮間風
水結腫除心下急滿及霍亂吐下不止利腰臍間血益
津液暖胃消穀嗜食作煎餌久服輕身延年不饑

茅山者為

勝忌蛤雀桃
李松菜青魚

疏○朮稟初夏之氣以生其味苦其氣溫從火化也
正得土之沖氣故別錄益之以甘表土德也故無毒
其氣芳烈其味甘濃其性純陽為除風痺之上藥安
脾胃之神品本經主風寒濕痺死肌痙疸者正以風
寒濕三者合而成痺痺者拘攣而痛者是也經曰地
之濕氣感則害人皮肉筋骨死肌者濕毒侵肌肉也
痙者風寒乘虛客於肝脾腎所致也疸者脾胃虛而
濕熱瘀滯也如上諸病莫不由風寒濕而成朮有除

此三邪之功故能祛其所致之疾也止汗除熱消食者濕熱盛則自汗濕邪客則發熱濕去而脾胃燥燥則食自消汗自止熱自除也又主大風在身面者木氣芳烈而悍純陽之物也風為陽邪發於陽部故主之也風眩頭痛目淚出者陽虛則風客之而眩痰厥則頭痛風熱壅則目淚出也消痰水逐皮間風水結腫除心下急痛及霍亂吐下不止者濕客於胃則滯而生痰客於脾則生水脾虛濕勝則為水腫濕客中

焦則心下急滿脾胃俱虛則中焦不治而濕邪客之
則為霍亂吐下不止也利腰臍間血者血屬陰濕為
陰邪下流客之使腰臍血滯而不得通利濕去則諸
證無不愈矣益津液煖胃消穀嗜食者濕去則胃強
而津液自生寒濕散則胃自煖邪去而脾胃健則消
穀而嗜食矣煎餌久服輕身延年不饑者朮為陽藥
故善除陰濕濕去則脾胃之氣旺陽主氣氣盛則身
輕脾主四肢濕去則脾健健則四肢利故能涉險負

重也仙經云氣滿不思食是以延年而不饑也

主治參互

朮為陽草氣勝黃精除濕祛寒踈風辟惡其功能也
單餌則延年輕身不饑兼濟則觀所從何道故同人
參茯苓白芍藥甘草橘皮蓮肉縮砂則健脾開胃消
飲食為壯脾胃之要劑調中之正法 同藿香橘皮
茯苓人參木瓜猪苓澤瀉縮砂則治霍亂吐瀉轉筋
同乾葛防風茯苓炙甘草車前子猪苓澤瀉則治

濕勝作洩若雷奔 同秦艽萆薢木瓜薏苡仁桑寄

生石斛黃耆地黃石菖蒲桂枝甘草晚蠶沙則治一

切痛痺及關節不利熱者去桂枝加黃檗 得黃檗

牛膝木瓜石斛能健步潜行 得苦參牡蠣治小兒

胃家濕熱飲食不生肌肉 君人參芍藥木瓜薏苡

茯苓桑白皮赤小豆車前橘皮佐以猪苓澤瀉能治

一切水腫日重則倍人參夜重則加地黃芍藥俱與

朮倍 君枳實橘皮砂仁半夏人參則除心腹脹痛

消宿食開胃去痰涎除傷食發寒熱及泄瀉 同人
參橘紅白茯苓木瓜藿香治反胃吐逆因於寒則加
生薑因於熱則加竹茹枇杷葉逆水蘆根 君黃耆
生地黃佐以黃檗治一切臙瘡濕毒攻注足脛成瘡
久不愈作丸餌良 倍茯苓脩事如經驗方能烏鬚
駐顏 同麥門冬石斛黃檗白芍藥木瓜薏苡仁五
味子為治痿要藥 同生薑藿香檳榔能治山嵐瘴
氣 同四物湯麥門冬荆芥防風地榆能治腸風下

血 同雄羊肝治雀盲 同補骨脂川椒茴香青鹽
川棟子黃檗治疝 同熟地桑椹脩事採日精月華
乾則蜜丸日三服可變白 為末和芝蔴研爛入水
攪勻絞汁濾淨曝乾每三錢空心酒服能滋脾胃

簡誤

術本經無分別陶弘景有赤白二種近世乃有蒼白
之分其用較殊要之俱為陽草故祛邪之功勝而益
陰之効虧藥性偏長物無兼力此天地生物自然之

道也凡病屬陰虛血少精不足內熱骨蒸口乾唇燥咳嗽吐痰吐血鼻衄齒衄咽塞便秘滯下者法咸忌之木燥腎而閉氣肝腎有動氣者勿服劉涓子癰疽論云潰瘍忌白朮以其燥腎而閉氣故反生膿作痛也凡臟皆屬陰世人但知朮能健脾此蓋指脾為正邪所干朮能燥濕濕去則脾健故曰補也寧知脾虛而無濕邪者用之反致燥竭脾家津液是損脾陰也何補之足云此最易誤故特表而出之

菟絲子味甘辛甘平無毒主續絕傷補不足益氣力肥健
汁去面黥養肌強陰堅筋骨主莖中寒精自出溺有餘
瀝口苦燥渴寒血為積久服明目輕身延年

得酒良宜
丸不宜煮

疏○菟絲子君稟春末夏初之氣以生凝乎地之冲
氣以成感秋之氣而實故本經言其味辛平別錄益
之以甘者正雷公所謂稟中和凝正陽之氣而結者
也其為無毒明矣五味之中惟辛通四氣復兼四味
經曰腎苦燥急食辛以潤之菟絲子之屬是也與辛

香燥熱之辛迥乎不同矣學者不以辭害義可也為
補脾腎肝三經要藥主續絕傷補不足益氣力肥健
者三經俱實則絕傷續而不足補矣脾統血合肌肉
而主四肢足陽明太陰之氣盛則力長而肥健補脾
故養肌益肝腎故強陰堅筋骨煖而能補腎中陽氣
故主莖中寒精自出溺有餘瀝口苦燥渴者脾腎虛
而生內熱津液因之不足也二臟得補則二病自愈
寒血為積者勞傷則血瘀陽氣乏絕則內寒血隨氣

行氣弱不能統血以行久而為積矣凡勞傷皆脾腎
肝三臟主之肝脾氣王則瘀血自行也久服明目輕
身延年者目得血而能視肝開竅於目瞳子神光屬
腎肝腎實則目自明藏實精滿則身自輕延年可必
矣

主治參互

君蓮實山藥人參能實脾止泄嗜食加五味子肉豆
蔻砂仁能治腎泄 同五味子沙苑蒺藜覆盆子蓮

鬚山茱萸巴戟天車前子沒食子枸杞子能益脾胃
固精種子 同甘菊花沙苑蒺藜甘枸杞子熟地黃
羚羊角穀精草決明子能明目 君木人參牛膝胡
麻仁治丈夫腰膝積冷痛或頑麻無力 單服偏補
人衛氣能助人筋脈 王好古云能補肝臟虛故去
風專主腰膝腰膝者肝腎之所治也 苗生研塗面
斑神效

簡誤

腎家多火強陽不痿者忌之大便燥結者亦忌之

牛膝君味苦酸平無毒主寒濕痿痺四肢拘攣膝痛不可屈伸逐血氣傷熱火爛墮胎療傷中少氣男子陰消老人失溺補中續絕填骨髓除腦中痛及腰脊痛婦人月水不通血結益精利陰氣止髮白久服輕身耐老

忌牛

肉牛
乳

疏○牛膝君稟地中陽氣以生氣則兼乎木火之化也故其味苦酸平無毒味厚氣薄走而能補性善下

行故入肝腎主寒濕痿痺四肢拘攣膝痛不可屈伸者肝脾腎虛則寒濕之邪客之而成痺及病四肢拘攣膝痛不可屈伸此藥既稟地中陽氣所生又兼木火之化其性走而下行其能逐寒濕而除痺也必矣蓋補肝則筋舒下行則理膝行血則痛止逐血氣猶云能通氣滯血凝也詳藥性氣當作痺傷熱火爛血焦枯之病也血行而活痛自止矣入肝行血故墮胎傷中少氣男子陰消老人失溺者皆腎不足之候也

腦為髓之海腦不滿則空而痛腰乃腎之腑脊通髓於腦腎虛髓少則腰脊痛血虛而熱則髮白虛羸勞頓則傷絕肝藏血腎藏精峻補肝腎則血足而精滿諸證自瘳矣血行則月水自通血結自散久服輕身耐老悉如上說不復具疏

主治參互

君木仙茅木瓜石斛茯苓石南葉五加皮萆薢生地黃黃耆芍藥虎骨沈香桂治諸痺 同甘菊花石斛

木瓜何首烏生地黃虎骨沈水香人參朮黃耆天門冬麥門冬杜仲續斷芍藥橘皮黃檗桑寄生白蘚皮
治一切痿痺四肢拘攣筋骨疼痛 君當歸地黃能

下死胎加朴硝立下胞衣 君木瓜石斛萆薢生地

黃黃檗五加皮骨碎補續斷金銀花白及芍藥甘草

甘菊根紫花地丁茜草連翹治鶴膝風 根苗同用

二三兩濃煎調鼈甲末三錢空心服治瘡在陰分久
不瘥者三劑必已胃虛者加人參兩許橘皮去白五

錢 君青蒿生地黃麥門冬甘枸杞子熬膏治婦人
血虛發熱內熱口乾舌苦 治小便不利莖中痛欲
死兼治婦人血結腹堅痛鮮牛膝三四兩白酒煎濃
服之立愈 金瘡作痛生搗傅之立瘥

簡誤

誤用傷胎經閉未久疑似有娠者勿用上焦藥中勿
入血崩不止者忌之

菴蔚子味辛甘微溫微寒無毒主明目益精除水氣療

血逆大熱頭痛心煩久服輕身莖主癰瘡癢可作浴湯

一名益母草

忌鐵

疏○芫蔚子稟地中之陽氣以生兼感乎上天春夏之氣而成亦陽草也味辛甘微溫微寒無毒入手足厥陰經為婦人胎產調經之要藥此藥補而能行辛散而兼潤者也目者肝之竅也益肝行血故明目益精其氣純陽辛走而不守故除水氣肝臟有火則血逆肝涼則降而順矣大熱頭痛心煩皆血虛而熱之

候也清肝散熱和血則頭痛心煩俱解微溫微寒說
見人參條內

主治參互

午月五日采紫花益母草搗汁分貯瓷器內各少許
曬乾別取和蜂蜜封固加入參琥珀乳香沒藥血竭
沈香丹砂五靈脂催生及胞衣不下神效兼產後血
暈瘀血薄心惡露不行腹痛少腹兒枕痛調經治血
閉經阻經行作痛 單用和童便服能下死胎及治

熱入血室發熱煩躁類傷寒 君四物湯杜仲阿膠
真川續斷為丸安胎止痛 得生地黃白芍藥麥門
冬枇杷葉青蒿子五味子阿膠治血熱經行先期及
胎漏下血 同生甘菊蒼耳草金銀花紫花地丁各
一握貝母鼠黏子白芷殭蠶白及白斂生甘草連翹
生地黃各三錢熬夏枯草汁和藥同煎濃頓飲之消
一切疔腫發背及無名腫毒

簡誤

益母草辛甘為陽故性善行走能行血通經血崩禁用
瞳子散大禁用惟熱血欲貫瞳人者與涼血藥同
用則不忌

姜蕤味甘平無毒主中風暴熱不能動搖跌筋結肉諸
不足心腹結氣虛熱濕毒腰痛莖中寒及目痛背爛淚
出久服去面黑黥好顏色潤澤輕身不老

疏○姜蕤稟天地清和之氣而得稼穡之甘故本經
味甘平無毒主諸不足久服好顏色潤澤輕身不老

別錄又主心腹結氣虛熱腰痛莖中寒目痛皆爛淚
出甄權主內補不足去虛勞客熱頭痛不安加而用
之良日華子謂其除煩悶止渴潤心肺補五勞七傷
虛損腰脚疼痛詳味諸家所主則知其性本醇良氣
味和緩譬諸盛德之人無往不利終始一節故可長
資其利用而不窮正如斯藥之能補益五藏滋養氣
血根本既治餘疾自除夫血為陰而主駐顏氣為陽
而主輕身陰精不足則發虛熱腎氣不固則見骨痿

及腰脚痛虛而火炎則頭痛不安目痛背爛淚出虛而熱壅則煩悶消渴上盛下虛則莖中寒甚則五勞七傷精髓日枯而成虛損之證矣以一藥而所主多途為効良夥非由滋益陰精增長陽氣其能若是乎迹其所長殆亦黃精之類歟其主中風暴熱不能動搖跌筋結肉濕毒等證皆是女萎之用以本經二物混同一條故耳或謂即青黏理或有之純而不駁和而不偏有益無損故無簡誤 昔彭城樊阿少師事

華陀陀授以漆葉青黏散服之利五藏去蟲輕身益氣年至五百餘歲青黏生豐沛彭城及朝歌一名地節一名黃芝主理五藏益精氣本出於迷人入山見仙人服之以告陀陀以為佳語阿阿秘之人見阿之壽而氣力强盛問之因醉誤說人服多驗後無復有人識青黏者或云即黃精之正葉者又云即姜蕤同黃精桑椹何首烏能駐顏

此胡君味苦平微寒無毒主心腹去腸胃中結氣飲食

積聚寒熱邪氣推陳致新除傷寒心下煩熱諸痰熱結
實胸中邪逆五藏間遊氣大腸停積水脹及濕痺拘攣
亦可作浴湯久服輕身明目益精

半夏為
之使

疏○柴胡稟仲春之氣以生兼得地之辛味春氣生
而升故味苦平微寒而無毒為少陽經表藥主心腹
腸胃中結氣飲食積聚寒熱邪氣推陳致新除傷寒
心下煩熱者足少陽膽也膽為清淨之府無出無入
不可汗不可吐不可下其經在半表半裏故法從和

解小柴胡湯之屬是也其性升而散屬陽故能達表散邪也邪結則心下煩熱邪散則煩熱自解陽氣下陷則為飲食積聚陽升則清氣上行脾胃之氣行陽道則飲食積聚自消散矣諸痰熱結實胸中邪逆五臟間遊氣者少陽實熱之邪所生病也柴胡苦平而微寒能除熱散結而解表故能愈以上諸病大腸停積水脹及濕痺拘攣者柴胡為風藥風能勝濕故也

主治叅互

仲景小柴胡湯中同人參半夏黃芩治傷寒往來寒熱口苦耳聾胸脇痛無汗又治少陽經瘧往來寒熱亦治似瘧非瘧大便不實邪不在陽明者 在大柴胡湯治傷寒表裏俱急 傷寒百合證在柴胡百合湯 東垣治元氣勞傷精神倦怠用參耆白朮炙甘草當歸佐以柴胡升麻引脾胃之氣行陽道名補中益氣湯 本方去當歸加茯苓豬苓澤瀉乾葛神麩名清暑益氣湯 同四物湯去當歸加澤蘭益母草

青蒿能治熱入血室 同升麻乾葛等能升陽散火
同生地黃黃檗黃連甘草甘菊玄參連翹羌活荆
芥穗治暴赤眼

簡誤

柴胡性升而發散病人虛而氣升者忌之嘔吐及陰
虛火熾炎上者法所同忌瘧非少陽經者勿入治瘧
必用柴胡其說誤甚不可久服亦無益精明目之理
盡信書則不如無書此之謂也按今柴胡俗用有二

種色白黃而大者為銀柴胡用以治勞熱骨蒸色微黑而細者用以解表發散本經並無二種之說功用亦無分別但云銀州者為最則知其優於升散而非除虛熱之藥明矣衍義所載甚詳故并錄之

附衍義曰柴胡本經並無一字治勞今人方中鮮有不用者嗚呼凡此誤世甚多嘗原病勞有一種真藏虛損復受邪熱邪因虛而致勞故曰勞者宰也當須斟酌用之如經驗方中治勞熱青蒿煎之用柴胡正

合宜耳服之無不効熱去即須急已若或無表熱得此愈甚雖至死人亦不悟目擊甚多可不戒哉可不慎哉日華子又謂補五勞七傷藥性論亦謂治勞乏羸瘦若此等病苟無實熱醫者執而用之不死何待注釋本草一字亦不可忽萬世之後所誤無窮耳

麥門冬君味甘平微寒無毒主心腹結氣傷中傷飽胃絡脈絕羸瘦短氣身重目黃心下支滿虛勞客熱口乾燥渴止嘔吐愈痿癈強陰益精消穀調中保神定肺氣

安五藏令人肥健美顏色有子久服輕身不老不饑

疏○麥門冬在天則稟春陽生生之氣在地則正感
清和稼穡之甘本經甘平平者冲和而淡也別錄微
寒著春德矣入足陽明兼入手少陰太陰實陽明之
正藥主心腹結氣者邪熱之氣結於心腹間也以其
清和微寒而平緩故能散熱結而下逆氣也傷中傷
飽以致胃絡脈絕者脾主肌肉五臟之氣皆稟於胃
胃病則脾無所稟故羸瘦而短氣也身重目黃者脾

胃濕熱也心下支滿者脾虛而濕滯中焦也虛勞客熱口乾燥渴者因虛勞而熱客中焦故口乾而燥渴陽明之熱上衝則兼嘔吐也痿躄者陽明濕熱病也陽明濕熱盛則上熏蒸於肺而為痿躄治痿獨取陽明治本之道也陰精生於五味五味先入脾胃脾胃得所養則能散精於各臟而陰精充滿故能強陰益精也中焦者脾胃之所治也脾胃安則中焦治故能消穀而調中也保神定肺氣則兼潤乎心肺矣胃氣

盛則五臟之氣皆有所稟而安脾胃俱實則能食而肥健脾統血心主血五臟之英華皆見於面血克臟安則華彩外發而顏色美矣脾胃強則後天之元氣日盛下氣則陽交於陰交則虛勞愈而內熱不生內熱去則陰精日盛故有子斷穀固著於仙經却乃已疾之良藥故久服延年輕身而不老不饑也

主治參互

同人參五味子為生脈散能復脈通心夏月暑傷氣

服之良酒後飲之解酒毒肺熱者去人參加甘枸杞
子作飲治一切虛勞客熱 同五味子枸杞地黃牛

膝鼈甲酸棗仁天冬治五勞七傷胃強者可加當歸
火盛者可入黃檗砂仁甘草三物俱遞減 治陽明

瘧大渴引飲煩躁或嘔吐麥門冬石膏知母竹葉各
數兩病人虛者加人參兩許痰多者加貝母橘紅各
兩許 藥性論云麥門冬止煩渴主大水面目肢節
浮腫下水治肺痿吐膿宜同天門冬薏苡仁黃檗芍

藥茯苓石斛桑根白皮五味子牛膝煮飲彌佳 止

泄精宜兼覆盆蒺藜黃檗五味子 同茯苓車前黃

連石斛猪苓澤瀉療心腹結氣身重目黃 日華子

治五勞七傷安魂定魄止渴肥人時疾熱狂頭痛止

嗽故同石膏知母竹葉粳米專療時氣頭痛大渴煩

躁及發狂甚者須各數兩濃煎頓飲乃佳虛羸人因

作勞內傷而發者可量加人參名人參白虎湯有肺

熱者勿入人參 崔元亮海上方同黃連治消渴

衍義治心肺虛熱虛勞客熱入沙參五味子 同青
蒿鼈甲牛膝地黃芍藥天門冬枸杞子五味子胡黃
連山藥茯苓山茱萸蜜丸治骨蒸勞熱

簡誤

麥門冬性寒雖主脾胃而虛寒泄瀉及痘瘡虛寒作
洩產後虛寒泄瀉者咸忌之

獨活味苦甘平微溫無毒主風寒所擊金瘡止痛責豚
癩瘡女子疝瘕療諸賊風百節痛風無久新者久服輕

身耐老一名羌活

瘕 症作

疏○獨活稟天地正陽之氣以生故味苦甘平甄權
潔古益之以辛微溫無毒氣味俱薄浮而升陽也足
少陰引經氣分之藥羌活性溫辛苦氣厚於味浮而
升陽也手足太陽行經風藥並入足厥陰少陰經氣
分羌活氣雄獨活氣細故雄者治足太陽風濕相搏
頭痛肢節痛一身盡痛者非此不能除乃却亂反正
之主君藥也細者治足少陰傷風頭痛兩足濕痺不

能行動非此不能除而不治太陽之證名列君部之中非比柔懦之主小無不入大無不通故能散肌表八風之邪利周身百節之痛其主風寒所擊金瘡止痛者金瘡為風寒之所襲擊則血氣壅而不行故其痛愈甚獨活之苦甘辛溫能辟風寒邪散則肌表安和氣血流通故其痛自止也黃豚者腎之積腎經為風寒乘虛客之則成黃豚此藥本入足少陰故治黃豚瘡與瘰皆風邪之所成也風去則瘡自愈矣女

子疝瘕者寒濕乘虛中腎家所致也若能燥濕溫能
辟寒辛能發散寒濕去而腎臟安故主女子疝瘕及
療諸賊風百節痛風無久新也輕身耐老定非攻邪
發散之藥所能烏可久服哉本經載之誤矣二藥本
一種第質有虛實老嫩氣有厚薄之不同耳

主治參互

君麻黃甘草主冬月即病傷寒太陽經頭疼發汗解
表 君麥門冬前胡黃芩佐以甘草治春時瘟疫邪

在大陽頭痛

入葛根湯治太陽陽明頭痛兼遍身

骨痛口渴煩熱不得眠若渴甚煩熱甚頭痛甚則加

石膏知母竹葉各兩許

瘧發太陽經頭痛者於治

瘧藥中加之痛止則去之

同白朮蒼朮秦艽生地

黃薏苡仁木瓜石斛黃蘗治下部一切風濕濕熱

同生地黃赤芍藥生甘草牡丹皮石膏等水煎治風

熱上攻牙腫痛

同萊菔子炒香只取羌活為末每

服二錢溫酒調下一日一服二日二服三日三服治

妊娠浮腫由於風濕出許學士本事方 人睛忽垂
至鼻如黑角塞痛不可忍或時時大便血出痛名曰
肝脹羌活一味煎汁服數盞自愈出夏子益竒疾方

簡誤

獨活羌活陽草中之風藥也本為祛風散寒除濕之
要品風能勝濕以其性燥故也本經別錄並載主中
風及諸風不知真中風惟西北邊塞高寒之地風氣
剛猛虛人當之往往猝中或口眼歪邪或口噤不語

或手足癱瘓左右不仁或剛瘓柔瘓即角弓反張此藥與諸風藥並用可也若夫江南吳楚越閩百粵鬼方梁州之域從無剛勁之風多有濕熱之患質脆氣虛多熱多痰其患中風如前等病外證雖一一相似而其中實非何者此皆劉河間所謂將息失宜水不制火丹溪所謂中濕中痰中氣是也此則病係氣血兩虛虛則內熱煎熬津液結而為痰熱則生風故致猝倒亦如真中風狀而求其治療之方迥若天淵外

邪之氣勝則實實則瀉之祛風是已內而真氣不足則虛虛則補之調氣補血生津清熱是已倘誤用風藥反致燥竭其津液血愈不足而病愈沈困命曰虛虛攻補既謬死生遂殊粗工懵昧執迷不悟茲特表而明之又有血虛頭痛及遍身疼痛骨痛因而帶寒熱者此屬內證誤用反致作劇

升麻味甘苦平微寒無毒主解百毒殺百精老物殃鬼辟瘟疫瘴氣邪氣蠱毒入口皆吐出中惡腹痛時氣毒

癘頭痛寒熱風腫諸毒喉痛口瘡久服不夭輕身長年
疏○升麻稟天地清陽之氣以生陽草也故味甘苦
平微寒無毒潔古又云性溫味辛微苦氣味俱薄浮
而升陽也為足陽明太陰引經的藥得葱白白芷緩
帶脈之縱急亦入手陽明大腸升陽氣於至陰之下
春氣生生而上升升麻正得之故主解百毒感清陽
之氣者必能破幽暗故殺百精老物殃鬼辟瘟疫瘴
氣邪氣蠱毒入口皆吐出凡云甘者其氣必和升則

必散和而散故主中惡腹痛時氣毒癘頭痛寒熱風
腫諸毒喉痛口瘡者手少陽足陽明太陰熱極故也
散三經之火則二證愈矣未載久服不夭輕身長年
此豈發散之藥所能哉無是理也

主治參互

升麻葛根湯散足陽明之熱邪發手太陰陽明之斑
癍及天行跖豆瘡水煎綿沾拭之 引葱白散手陽
明風邪引石膏止陽明經齒痛或加生地黃麥門冬

知母牡丹皮黃檗連翹玄參彌良 醋炒綠色升麻

君連肉人參治噤口痢有神 同石膏知母麥門冬

竹葉治陽明熱極發斑頭疼口渴 佐參耆引清陽

之氣上升行陽道故補脾胃藥中不可闕 入升陽

散火湯治陽氣鬱遏及元氣不足陽氣下陷 同荆

芥防風黃芩甘草白芷能去皮膚風邪 同葛根荆

芥菊花甘草解肌肉間風熱兼發浮汗 同葛根連

翹玄參甘草生地黃麥門冬治牙根浮爛惡臭 為

小兒斑痧及天行瘡子家聖藥天行瘡子即痘也未見點時可用見標之後不可用 同鬱金服治蠱毒不吐則下 同射干水煎服治射工溪毒并以滓塗之 同生地黃麥門冬牛膝蒲黃水煎治小兒尿血 佐黃連紅麴滑石白芍藥蓮肉甘草為治一切滯下要藥

簡誤

升麻屬陽而性升其功用如經說凡吐血鼻衄咳

嗽多痰陰虛火動腎經不足及氣逆嘔吐驚悸怔忡
癲狂等病法咸忌之誤用多致危殆

車前子味甘鹹寒無毒主氣癰止痛利水道小便除濕
痺男子傷中女子淋瀝不欲食養肺強陰益精令人有
子明目療赤痛久服輕身耐老 葉及根味甘寒主金
瘡止血衄鼻瘀血血瘕下血小便赤止煩下氣除小蟲
疏○車前子稟土之冲氣兼天之冬氣以生故味甘
寒而無毒別錄兼鹹故走水道其主氣癰止痛通腎

氣也小便利則濕去濕去則痺除傷中者必內起煩
熱甘寒而潤下則煩熱解故主傷中女子淋瀝不欲
食是脾腎交病也濕去則脾健而思食氣通則淋瀝
自止水利則無胃家濕熱之氣上熏而肺得所養矣
男女陰中俱有二竅一竅通精一竅通水命門真陽
之火即係先天之元氣道家謂之君火後天之精氣
亦與之合而繫焉膀胱者濕熱濁陰之水滲出下竅
為小便道家謂之民火是也二竅不並開故水竅常

開則小便利而濕熱外洩不致鼓動真陽之火則精
竅常閉而無漏洩久久則真火寧謐而精用益固精
固則陰強精盛則生子腎氣固即是水臟足故明目
及療赤痛輕身耐老即強陰益精之驗肝腎膀胱三
經之要藥也 葉及根味甘寒金瘡必發熱熱則痛
極甘寒能涼血除熱故主金瘡血熱則妄行溢出上
竅故主吐衄及尿血便赤止煩下氣 明醫雜錄云
根葉治鼻衄尿血熱痢搗汁飲之子主氣瘰利水道

療肝中有風熱衝目若人服固精藥久服此一泄即
有子

主治參互

同木通沈香橘皮升麻治氣癰 同二朮宣木瓜石
斛川萆薢茯苓五加皮治濕痺 獨用為末米飲下
二錢七治暴瀉神効 君白芍藥白茯苓白藕豆豉
甘草治水洩 同生地黃牛膝天門冬麥門冬黃蘗
五味子甘枸杞子人參白膠治尿血及婦人血淋

入十子衍宗丸為生精種子要藥 入金匱腎氣丸

則固精益陰 獨用炒為末專治濕勝水瀉 同五

味子覆盆子蓮子蓮鬚山茱萸肉沒食子沙苑蒺藜

人參麥門冬牛膝白膠魚膠能強陰固精種子 同

生地黃甘菊花決明子玄參蜜蒙花連翹黃連柴胡

生甘草治暴赤目痛

簡誤

車前子性走下竅雖有強陰益精之功若遇內傷勞

倦陽氣下陷之病皆不當用腎氣虛脫者忌與淡滲藥同用

木香味辛溫無毒主邪氣辟毒疫溫鬼強志主淋露療氣劣肌中偏寒主氣不足消毒殺鬼精物溫瘧蠱毒行藥之精久服不夢寤魘寐輕身致神仙

疏○青木香味辛溫無毒是稟夏秋之陽氣以生兼得土之陽精故無毒性屬純陽故主邪氣辟毒疫溫鬼陽主清明開發故強志及不夢寤魘寐行藥之精

皆陽盛氣烈之功也

主治參互

同延胡索治一切女人血氣刺心痛不可忍 同牽
牛雷丸檳榔殺一切蟲 佐黃連芍藥治一切滯下
惟身熱作嘔逆口渴者勿用 同橘皮砂仁白豆蔻
紫蘇葉調一切氣不通順及冷氣攻痛作泄大怒後
氣逆胸膈脹滿兩脇作痛

簡誤

詳其治療與今白木香當是兩種按圖經謂生永昌
又云今惟廣州舶上有來者一云出大秦國一云產
崑崙則所出地土各異是名同而實異可知已藥性
論云當以崑崙來者為勝此絕不可得又云西胡來
者劣今市肆所有正白木香也其味辛其氣溫專主
諸氣不順求其能辟毒疫溫鬼殺鬼精物恐或未然
也肺虛有熱者慎毋犯之元氣虛脫及陰虛內熱諸
病有熱心痛屬火者禁用傷寒類要所載治天行熱

病若發赤豆斑用青木香水煮服者蓋指崑崙來者
一種定非坊間所市廣州舶上世所常用之白木香
也

薯蕷味甘溫平無毒主傷中補虛羸除寒熱邪氣補中
益氣力長肌肉主頭面遊風頭風眼眩下氣止腰痛補
虛勞羸瘦充五藏除煩熱強陰久服耳目聰明輕身不
饑延年

疏○薯蕷得土之冲氣兼稟春之和氣以生故味甘

溫平無毒觀其生搗敷癰瘡能消熱腫是微寒之驗也甘能補脾脾統血而主肌肉甘溫能益血脾治中焦故主傷中補虛羸補中益氣力長肌肉充五臟除煩熱強陰也其主寒熱邪氣及頭面遊風頭風眼眩下氣止腰痛者正以其甘能除大熱甘能益陰氣甘能緩中甘溫平能補肝腎藥性論云薯蕷臣能補五勞七傷去冷是也蓋寒熱邪氣者陰不足則內熱內虛則外邪客之熱則生風緩則下氣下氣則陽交於

陰五勞既去五藏既充則久服耳目聰明輕身延年之効自著矣

主治參互

同地黄枸杞牛膝甘菊花白蒺藜五味子則補肝腎
益陰氣治一切虛羸強陰長肌增力明目 同蓮肉
白菟苳人參白芍藥茯苓炙甘草橘皮則補脾健胃
止洩瀉加木瓜藿香安吐逆 同羊肉肉蓯蓉作羹
可扶衰補虛羸

簡誤

諸蕒薯蕷確係兩種譬諸米穀其種有粳糯秈黍稷之不同是也入藥必以冀州所產者為勝總之南方不迨北地圖經并載入四明則誤矣不宜與麩同食
薏苡仁味甘微寒無毒主筋急拘攣不可屈伸風濕痺下氣除筋骨邪氣不仁利腸胃消水腫令人能食久服
輕身益氣

疏○薏苡仁正得地之燥氣兼稟乎天之秋氣以生

故味甘淡微寒無毒陽中陰降也經曰地之濕氣感則害人皮肉筋脈又曰風寒濕三者合而成痺此藥性燥能除濕味甘能入脾補脾兼淡能滲泄故主筋急拘攣不可屈伸及風濕痺除筋骨邪氣不仁利腸胃消水腫令人能食久服輕身總之濕邪去則脾胃安脾胃安則中焦治中焦治則能榮養乎四肢則通利乎血脈也甘以益脾燥以除濕脾實則腫消脾強則能食濕去則身輕如是則已上諸疾不求其愈而

自愈矣

主治叅互

同木瓜石斛萆薢黃檗生地黃麥門冬治痿厥 同
五加皮牛膝石斛生地黃甘草主筋拘急加二朮菖
蒲甘菊花可治痺佐以附子能治胸痺偏緩 獨用
數兩淘淨煮濃湯頓飲可治肺經因濕火所傷吐膿
血一切肺痿肺癰咳嗽涕唾上氣經曰治痿獨取陽
明陽明者胃與大腸也二經濕熱盛則成痿熏蒸於

肺則發肺癰及吐血咳嗽涕唾穢濁蓋肺與大腸為表裏腑熱必傳於臟大腸與胃家之濕熱散則痿自愈吐膿血咳嗽亦並止矣

簡誤

薏苡乃除濕燥脾胃之藥凡病人大便燥小水短少因寒轉筋脾虛無濕者忌之妊娠禁用

澤瀉味甘鹹寒無毒主風寒濕痺乳難消水養五臟益氣力肥健補虛損五勞除五藏痞滿起陰氣止洩精消

渴淋瀝逐膀胱三焦停水久服耳目聰明不饑延年輕
身面生光能行水上扁鵲云多服病人眼

疏○澤瀉稟地之燥氣天之冬氣以生故味甘寒別
錄益之以醜腎為膀胱為表裏醜能入腎甘能入脾
寒能去熱蓋淡滲利竅之藥也其曰主風寒溼痺乳
難消水養五臟皆以利水燥溼則脾得所養脾得所
養則五臟皆得所養益氣力肥健者皆水利則溼去
溼去則脾強之功効也又云主腹痞滿淋瀝逐膀胱

三焦停水其能利水祛溼益無疑矣洩精者溼熱下
流客腎與膀胱是民火扇君火也故精搖而洩病在
脾胃溼熱盡則洩精自止矣止消渴者單指溼熱侵
脾胃為邪所干則不能致津液也總之其性利水除
溼則因溼熱所生之病靡不除矣

主治參互

水腫晝劇夜平者陽水也澤瀉同猪苓白茯苓人參
白朮白芍藥赤小豆桑白皮橘皮治之多服必愈夜

劇晝平者陰水也同車前子赤茯苓生地黃白芍藥
赤小豆桑根白皮木瓜石斛薏苡仁治之多服必愈
入五苓散四苓散治一切溼熱 入六味地黃丸

除陰虛病有溼熱者 同人參白朮半夏茯苓橘皮
紫蘇猪苓為治飲之要藥一切停飲停水無不効

仲景治心下支飲澤瀉五兩朮二兩水二升煎取半
升分溫再服 素問身熱解墮汗出如浴惡風少氣
名曰酒風服之以澤瀉朮各十分糜銜五分合以二

指撮食後服之 飲證病甚欲眩者用澤瀉五兩炒
朮二兩水三升煮濃服必効 仲景治水搖渴煩小
便不利或吐或瀉五苓散主之

簡誤

澤瀉本經及藥性論日華子皆曰補虛損五勞久服
耳目聰明不饑延年及仙經斷穀腎虛精自出補女
人血海令人有子等條則悖謬之談文不屬理非神
農氏之言明矣扁鵲云多服病人眼乃為確論也澤

瀉善逐水病人無溼無飲而陰虛及腎氣乏絕陽衰
精自流出腎氣不固精滑目痛虛寒作洩等候法咸

禁用誤犯令人虛極

遠志君味苦溫無毒主欬逆傷中補不足除邪氣利九
竅益智慧耳目聰明不忘強志倍力利丈夫定心氣止
驚悸益精去心下膈氣皮膚中熱面目黃久服輕身不

老好顏色延年

莖名小草主益精補
陰氣止虛損夢洩

疏○遠志感天之陽氣得地之芳烈而生故無毒亦

陽草也其菖蒲之流乎其味苦溫兼微辛為手少陰
經君藥兼入足太陰經苦能洩熱溫能壯氣辛能散
鬱故主欬逆傷中補不足養性全神明故除邪氣陽
主發散故利九竅心氣開通則智慧自益經曰心為
君主之官神明出焉天君既定五官自明故耳目聰
明不忘強志陽氣盛則力增長男子屬陽故利丈夫
定心氣止驚悸者心臟得補而實故心氣定而驚悸
止也心火不妄動則陽不妄舉精不搖矣故益精心

下膈氣是心氣鬱而不舒也皮膚中熱面目黃者溼熱在上部也苦以洩之溫以暢之辛以散之則二證自去矣久服輕身不老好顏色延年者心主血心氣足則血色華於面君主強明則十一官皆得職故延年不老陽氣日積故身輕也人之心腎晝夜必交心家氣血旺盛則腎亦因之而實腎藏精與志腎實故志强也 莖名小草性味略同功用相近故亦主益精補陰氣止虛損夢洩

主治參互

同茯神人參地黃酸棗仁丹砂為鎮心定驚要藥

同人參白芍藥酸棗仁茯神炙甘草天竺黃鈎藤鈎

治兒心虛易驚加白檀香治一切驚及慢驚 同茯

神天竺黃鈎藤鈎丹砂金箔真珠虎珀胆星犀角治

小兒急驚 同人參栢子仁酸棗仁麥門冬五味子

當歸身茯神茯苓益智仁生地黃甘草沈香治心氣

弱心血少餒怯易驚夢寐多魘神不守舍怔忡健忘

失志陽痿 同茯神人參白朮龍眼酸棗仁木香炙
甘草能歸脾益智 入當歸六黃湯能止陰虛盜汗
加甘草治婦人血噤失音小兒客忤 古今錄驗
及范汪方治胸痺心痛逆氣膈中飲不下小草丸小
草桂心蜀椒去目乾薑細辛各三兩附子二分炮去
皮臍共為末蜜丸如梧子大先食米汁下三九日三
不知稍增以知為度禁猪肉冷水生葱菜 遠志一
味煎酒治一切癰疽發背病從七情憂鬱惱怒而得

者服之皆愈 陳言三因方用遠志酒治一切癱疽
發背惡候浸大有死血陰毒在中則不痛傳之即痛
有憂怒等氣積怒攻則痛不可忍傳之即不痛或蘊
熱在內熱逼人手不可近傳之即清涼或氣虛冷潰
而不斂傳之即斂此本韓大夫宅用以救人方極驗
若七情內鬱不問虛實寒熱治之皆愈用遠志不拘
多寡米泔浸洗槌去心為末每服三錢溫酒一盞調
澄少頃飲其清以滓敷患處

簡誤

心經有實火為心家實熱應用黃連生地黃者禁與參朮等補陽氣藥同用

龍膽味苦澁大寒無毒主骨間寒熱驚癇邪氣續絕傷定五藏殺蠱毒除胃中伏熱時氣溫熱熱洩下痢去腸中小蟲益肝膽氣止驚惕久服益智不忘輕身耐老

疏○草龍膽稟天地純陰之氣以生故其味大苦澁其性大寒而無毒足厥陰足少陰足陽明三經藥入

足少陰除本經之熱腎主骨故主骨間寒熱熱極生風則發驚搖重則變為癇病溼熱邪氣之在中下二焦者非此不去熱去則諸證自解五臟有熱則不安熱除則五臟自定苦澁而寒故殺蟲毒大苦大寒故能滌除胃中所伏實熱及時氣溫熱熱洩下痢去腸中小蟲熱清則肝膽之氣亦清故益肝膽氣而止驚惕也久服益智不忘輕身耐老則非其任矣

主治參互

草龍膽同白芍藥甘草茯苓神麥門冬木通圭小兒驚
癇入心壯熱骨熱時疾熱黃口瘡 同苦參牛膽治
穀疸 同苦參蛆蟲灰青黛治小兒一切疔熱狂語
及瘡疥 治虻蟲攻心如刺吐清水龍膽二兩去頭
剉水二盞煎取一盞去滓隔宿勿進食平旦時一頓
服之即差 同生地黃等分治溼熱傷血分浸大腸
以致卒下血多服必効

簡誤

草龍膽味既大苦性復大寒純陰之藥也雖能除實熱胃虛血少之人不可輕試凡病脾胃兩虛因而作泄者忌之凡病虛而有熱者勿用亦勿空腹服餌之令人溺不禁以其太苦則下泄太甚故也炮炙論以銅刀切去鬚土頭剉碎甘草汁中浸一宿漉出曝乾用

細辛味辛溫無毒主欬逆頭痛腦動百節拘攣風溼痺痛死肌溫中下氣破痰利水道開胸中除喉痺躄鼻風

痼疾下乳結汗不出血不行安五藏益肝膽通精氣久服明目利九竅輕身長年

疏○細辛稟天地陽升之氣以生故其味辛溫而無毒入手少陰太陽經風藥也風性升升則上行辛則橫走溫則發散故主欬逆頭痛腦動百節拘攣風溼痺痛死肌蓋痺及死肌皆是感地之溼氣或兼風寒所成風能除溼溫能散寒辛能開竅故療如上諸風寒溼疾也別錄又謂溫中下氣破痰開胸中除喉痺

躄鼻下乳結汗不出血不行益肝膽通精氣皆升發
辛散開通諸竅之功也其曰久服明目利九竅輕身
長年者必無是理蓋辛散升發之藥其可久服哉

主治參互

同石膏能治陽明火熱上攻以致齒痛 得當歸芍
藥芎藭牡丹藁本甘草白薇通治婦人子宮冷不受
孕 得鯉魚膽青羊肝甘菊花決明子療目痛 得
甘草療傷寒少陰咽痛 得藁本芎藭白芷荆芥防

風治風頭痛 得紫蘇防風甘草桔梗杏仁薄荷桑
白皮能解利傷風寒鼻塞

簡誤

細辛風藥也其性升燥發散故凡病內熱及火升炎
上上盛下虛氣虛有汗血虛頭痛陰虛咳嗽法皆禁
用即入風藥亦不可過五分以其氣味俱厚而性過
烈耳

石斛味甘平無毒主傷中除痺下氣補五藏虛勞羸瘦

強陰益精補內絕不足平胃氣長肌肉逐皮膚邪熱痹
氣脚膝疼冷痺弱久服厚腸胃輕身延年定志除驚

疏○石斛稟土中沖陽之氣兼感春之和氣以生故
其味甘平而無毒氣薄味厚陽中陰也入足陽明足
少陰亦入手少陰甘能除熱甘能助脾甘能益血平
能下氣味厚則能益陰氣故主傷中下氣補五藏虛
勞羸瘦強陰益精補內絕不足平胃氣長肌肉久服
厚腸胃輕身延年定志除驚者以其入胃入腎入心

脾補益四經則四經所生病皆得治療蓋皆益脾益胃益腎益心之功力也又主除痺逐肌膚邪熱滌氣脚膝疼冷痺弱者兼能除脾胃二經之溼故也

主治參互

同麥門冬白茯苓橘皮甘草則益胃強四肢 同麥

門冬五味子人參炙甘草白芍藥枸杞牛膝杜仲則

理傷中補五藏虛勞羸瘦強陰益精 同枇杷葉麥

門冬橘皮則下氣 得木瓜牛膝桑白皮石南葉白

蘇皮黃檗茯苓菖蒲則主諸痺及逐皮膚邪熱痹氣
冷痺弱 夏月一味酒蒸泡湯代茶頓健足力

簡誤

宜入湯酒不宜入丸其味不苦而帶甘其形長而細
中堅實者良酒洗蒸曬乾用慎毋誤用木斛味大苦
餌之損人亦不入上焦藥

巴戟天味辛甘微溫無毒主大風邪氣陰痿不起強筋
骨安五藏補中增志益氣療頭面遊風少腹及陰中相

引通下氣補五勞益精利男子

疏○巴戟天稟土德真陽之精氣兼得天之陽和陽主發散散則橫行是當木之令而兼金之用也故其味辛別錄益之以甘而本經又曰微溫無毒宜其然也其主大風邪氣及頭面遊風者風為陽邪勢多走上經曰邪之所湊其氣必虛巴戟天性能補助元陽而兼散邪况真元得補邪安所留此所以愈大風邪氣也主陰痿不起強筋骨安五臟補中增志益氣者

是脾腎二經得所養而諸虛自愈矣其能療少腹及陰中引痛下氣并補五勞益精利男子者五藏之勞腎為之主下氣則火降火降則水升陰陽互宅精神內守故主腎氣滋長元陽益盛諸虛為病者不求其退而退矣

主治參互

得黃檗橘核荔枝核牛膝川萆薢木瓜金零子懷生地黃治疝氣因于腎虛得五味子肉蓯蓉鹿茸山

茱萸栢子仁補骨脂枸杞子治陰痿去鹿茸肉苁蓉
加黃檗牛膝麥門冬生地黃車前子治陰虛白濁久
不愈 得鹿角栢子仁天門冬遠志蓮鬚覆盆黃檗
治夜夢鬼交洩精 同甘菊花石菖蒲何首烏刺蒺
藜黑豆山茱萸天門冬治頭面上風 得熟大黃治
飲酒人脚弱

簡誤

巴戟天性溫屬陽故凡病相火熾盛思慾不得便赤

口苦目昏目痛煩躁口渴大便燥閉法咸忌之

菴藺子味苦微寒微溫無毒主五藏瘀血腹中水氣臚脹留熱風寒溼痺身體諸痛療心下堅膈中寒熱周痺婦人月水不通消食明目久服輕身延年不老

疏○菴藺子得土之烈氣而微感天之陰氣味厚氣薄故味苦微寒微溫無毒察其功用必應兼辛藥性論加辛是也何者苦以洩下溫以開通使非兼辛胡能主五藏瘀血及腹中水氣臚脹留熱風寒溼痺身

體諸痛療心下堅膈中寒熱周痺婦人月水不通消
食明目耶正以其散中有補補而能行故列上經也

主治叅互

同牛膝茜草白及消腹癰去留血又主瘀血腹脹俗
呼為單腹脹四肢不腫者是其候也 善辟蛇蛇著
之即爛

簡誤

此行血散結之藥婦人月事不以時至審察未定者

不可輕用瘀血病見之不審者勿試

卷栢味辛甘溫平微寒無毒主五藏邪氣女子陰中寒熱痛癥瘕血閉絕子止欬逆治脫肛散淋結頭中風眩痿癈強陰益精久服輕身和顏色令人好容顏

疏○卷栢稟石之氣兼感天之陽氣以生故味辛溫別錄益之以甘平微寒無毒入足厥陰少陰血分藥也故主五臟邪氣女子陰中寒熱痛癥瘕血閉絕子又主痿癈強陰益精久服輕身和顏色當是理榮血

之要藥行而能補者也別錄又謂止欬逆治脫肛散
淋結頭中風眩其亦辛能散結辛能潤燥甘能緩中
甘能益血之謂歟

簡誤

孕婦禁用

辟虺雷味苦大寒無毒主解百毒消痰祛大熱療頭痛
辟瘟疫其狀如麤塊蒼朮節中有眼

疏○辟虺雷感天地陰寒之精其味苦氣大寒無毒

故主解百毒消痰祛大熱療頭痛辟瘟疫豫章人專
以此和諸草搗汁治疔瘡有神

藥王味甘平無毒解一切毒止鼻衄吐血祛煩躁苗莖
青色花黃色葉摘之有汁搗汁飲驗

疏○藥王稟天地清和生發之氣以生故其味甘平
無毒甘能解毒故主解一切毒平能涼血清熱故止
鼻衄吐血祛煩躁也

草犀根味辛平無毒主解諸藥毒嶺南及睦婺間如中

毒草此藥及千金藤並解之亦主蠱毒溪毒惡刺虎狼
蟲虺等毒天行瘧瘴寒熱咳嗽痰壅飛尸喉閉瘡腫小
兒寒熱丹毒中惡注忤痢血等並煮汁服之其功用如
犀故名草犀解毒為最

疏○草犀根得地之辛味感天之寒氣以生本草祇
言辛平詳治療功能專主解諸藥毒亦主蠱毒溪毒
惡刺虎狼蟲虺等毒天行瘧瘴寒熱咳嗽痰壅飛尸
喉閉瘡腫小兒寒熱丹毒中惡注忤痢血並煮汁服

之其功用如犀故名草犀解毒為最生衢婺江饒間
苗高二三尺獨莖根如細辛研服更良生水者名
水犀也

百草花主百病長生神仙亦煮花汁釀酒服之異類云
鳳剛者漁陽人也常採百花水漬封泥埋之百日煎為
丸卒死者內口中即活胡剛服藥百餘歲入地肺山列
仙傳云堯時赤松子服之得仙


疏○百草花當取羣草中之芳烈者大都百花必在

春時春者天地發生萬物之氣也花者華也因得天地發生之和氣抽其精英而為花故主百病長生神仙亦煮花汁釀酒服昔有採百花水漬泥封埋之百日煎為丸卒死者內口中即活其功固可驗矣

已上三種一種唐本餘二種陳藏器餘已下却有旱藕石藥仙人草會州白藥陳思岌千里及鐵葛伏鷄子根陳家白藥龍珠槌胡根甜藤孟娘菜吉祥草郎耶菜膏菜蓼蕎等功効雖多所產土地不

一罕識難致坊間無有故皆存而不論以俟後之

博物君子



神農本草經疏卷六